

# *FAMORIAN-DRANO*

## *MITRIATRIATRA*

 Ndeha isika hivavaka. Tompo, mino izahay ankehitriny. Mino an'ilay Zanak'Andriamanitra izahay, ka, amin'ny alàlan'izany, no anekenay ny Fiainana Mandrakizay amin'ny Alàlany. Miangona indray izahay ankehitriny, izao tolakandro izao, na izao takariva izao, ho an'ny favoriana anankiray, sady matoky Anao ny amin'ny Hafatra sy izay Holazainao aminay izao hariva izao. Mino Anao izahay, Tompo, sady miandry Anao. Fa hoy Ianao, "Izay miandry ny Tompo dia hanavao ny tanjany; elatra no hiakarany tahaka ny voromahery." Ary mangataka izahay, Andriamanitra, ny Hanomezanao anay an'io Hery mampakatra io, izao hariva izao, raha miandry Anao izahay.

<sup>2</sup> Misaotra Anao ny amin'ireto olona ireto, sy ny amin'izay maha-izy azy Aminao sy izay maha-izy azy amiko. Misaotra Anao aho ny amin'izany, Ray. Firavakao izy ireto. Ary mangataka aho, Andriamanitra, izao hariva izao, ny mba Hanehoanao ny Tenanao indrindra, amin'izy ireo, arak'izay ilainy avy. Raha misy marary eto, enga anie izy ho sitrana. Raha misy fisalasalana ao amin'ny sain'ny sasany; diovy izany, Tompo. Dia omeo anay fotsiny ny Fanatrehanao sy ny Fitahianao, satria ilainay izany, Tompo. Ianao no fahampianay rehetra. Fa, raha tsy misy Anao, dia tsy mahavita na inona na inona izahay.

<sup>3</sup> Mangataka izahay ny Handraisanao ny fankasitranahanay ny amin'izay rehetra Nataonao. Amin'ny Anaran'i Jesosy Kristy no iandrasanay fatratra ny Fitahianao. Amena.

Afaka mipetraka ianareo.

<sup>4</sup> Fa, eny, somary ma—mangatsiaka kely kokoa ity Alahady hariva ity, ny ato, noho ny tamin'ny Alahady hariva teo. Mankasitraka tokoa an'ireo rahalahintsika izay niasa mafy tamin'ny fametrahana an'izao isika. Ny roa na ny telo amin'izy ireo no fantattro. Rahalahy Mike Egan, izay hitako etsy aoriana, ary ny...Rahalahy Mike, sy Rahalahy Sothmann, Rahalahy (mino aho) Roy Roberson, sy Rahalahy Woods, ary izy rehetra, teto daholo izy ireo nilofo fatratra, niezaka nametraka an'izao mba ahafahantsika manana an'ity Hafatra ity ankehitriny, na androany. Koa, manana an'ity Hafatra ity ankehitriny, na androany. Koa, mankasitraka tokoa isika.

<sup>5</sup> Ankehitriny, amin'ny Alahady heriny maraina, raha sitraky ny Tompo, dia te-hanao favoriana ho an'ny fanasitranana aho, vavaka ho an'ny marary. Ary hatokantsika ho favoriana ho an'ny fanasitranana io, raha sitraky ny Tompo.

<sup>6</sup> Tsikaritro, izao maraina izao, fa misy mosàra maromaro eto. Nivavaka ho azy ireo aho. Ary izaho, nandritra ny nivavahanareo sy ny nihiranareo, no nivavahako ho an'ireo mosara ireo; ary misy betsaka eto izao hariva izao. Koa, isika—isika dia mino fa manasitrana ny marary Andriamanitra. Maro tokoa ireo vavolombelona ny amin'ny fanasitranana eto anivontsika, sy manerana an'izao tontolo izao, ka ankasitrahantsika ny amin'izay.

<sup>7</sup> Ary nieritreritra aho, amin'ny Alahady heriny, satria tsy maintsy handeha vetivety aho, sady isika nihazona betsaka teo amin'ny fampianarana sy ny Hafatra, dia nieritreritra aho fa ho zavatra tsara anankiray raha hanana fi—fivoriana anankiray ho an'ny fanasitranana isika, hivavaka ho an'ny marary. Ary matoky isika fa hanome fotoana lehibe ho antsika Andriamanitra.

<sup>8</sup> Ankehitriny, maro aminareo no tsy maintsy handeha fiara maily maro izao hariva izao. Niresaka tamin'ireo andian'olona tao amin'ny—ny Blue Boar Cafeteria koa aho, androany, izay nisakafoanako antoandro. Olona mahafinaritra maro, noraisiko tànana sy niresaka tamiko izy ireo, olona mbola tsy nihaona tamiko hatramizay, nefà manketo amin'ity fiangonana ity. Ary mankasitraka tokoa aho ny amin'ny sakaiza toy izany, sady tiako ny hisaotra ny tsirairay sy ianareo rehetra. Ny sasany tamin'izy ireo nioty voroihazo, ka nitondra ho anay. Nisy anankiray nitondra sirô iray siny ho anay, na ranom-boankazo, mino aho fa izay ilay izy, sy—sy maro hafa. Tsy fantatrareo hoe midika inona izany. Fa amin'ny maraina, tonga aho ka mivoaka ny trano, misy fotoana eo...

<sup>9</sup> Indray maraina nisy rahalahy anankiray teo izay tena sahirana tokoa, tsy nanana fitafiana sy ny sisa, ka nila ahy hanome azy fitafiana vitsy. Nivoaka aho, dia saika voafingan'ny siny iray nisy voroihazo nipetraka teo aho. Hoy aho hoe, “Ianao ve no nitondra an'ireto voroihazo ireto?”

<sup>10</sup> Dia hoy izy hoe, “Tsia, tsy misy idirako amin’io mihitsy. Efa talohan’ny fiposahan’ny andro no teto aho, ary efa nipetraka teo ireo.” Fa ilay Rahalahiko Ruddell mahafinaritra no nitondra an'ireo ho ahy. Koa, dia, azo antoka fa ankasitrahako izany zavatra izany.

<sup>11</sup> Vao nampahalala ahy Billy Paul, vao tsy ela teo, hoe tamin'izao favoriana androany hariva izao, dia nanangona rakitra izy ireo, ho ahy. Izaho—izaho dia misaotra anareo ny amin'izany. Tsy tiako ny hanaovanareo an'izany. Izaho—izaho dia mankasitraka fotsiny ny ezakareo, sy ny sisa, saingy tsy dia nilaina izany. Fa, nefà, hitahy anareo ny Tompo. Fantatrareo, fantatrareo, nilaza ny Baiboly, “Fa izay nataonareo tamin'ny anankiray amin'ireto kely indrindra ireto, dia nataonareo Tamiko.”

<sup>12</sup> Ankehitriny, karazany efa niresaka taminareo aho, ny amin'ny Hafatra, nivantana tokoa. Ary izaho... Ny olona sasany dia mety manana fiheverana fa—fa izaho dia mieritreritra fa Jesosy dia mety ho tonga anio maraina na izao hariva izao. Izany tokoa. Fa, tsy milaza aho hoe ho tonga Izy. Fa, mbola, mety tsy tonga amin'ny herinandro ho avy aza Izy, mety ho amin'ny herintaona izany, mety ho folo taona izany. Tsy fantattro hoe oviana Izy no ho tonga. Saingy, zavatra iray ihany no tiako...ataovy ao an-tsaina foana, aoka ho vonona ianareo isaky ny minitra na isan'ora. Hitanareo? Fa, raha tsy tonga androany Izy, dia mety ho eto Izy rahampitso. Koa tazony fotsiny ao an-tsainareo, fa ho avy Izy.

<sup>13</sup> Ary tsy fantattro izay ora farany ho ahy eto an-tany, isika rehetra tahaka izany. Ary tsy misy amintsika mahalala hoe rahoviana Izy no ho avy. Na Izy aza tsy nahalala, Izy Tenany, araka ny Tena Teniny mihitsy; hoy Izy, “Ny Ray, irery, no mahalala hoe rahoviana Izy no ho tonga; na ny Zanaka aza tsy mahalala hoe rahoviana Izy no ho tonga.” Ny fotoana andefasan’Andriamanitra amintsika Azy indray izany. Fa miandry ny Fihaviany isika. Ary raha tsy tonga amin'ny taranaka misy ahy Izy, dia mety ho Tonga amin'ny manaraka; raha tsy tonga amin'io Izy, dia ho Tonga amin'ny manaraka. Fa, ho an'ny tenako, dia tsy mahita andro sisa intsony aho. Izaho dia... Ho ahy, mety hitranga amin'ny minitra rehetra izany. Ankehitriny, tsy midika izany... Tsy midika izany, eto, hoe hahita ny lanitra hiova ianareo ka ny rehetra... Tsy izay Fihaviana izay no teneniko. Ny Fampakarana no resahiko.

<sup>14</sup> Hitanareo, Fihaviana telo no Ataony. Tonga amin'ny anaran'ny zanaka telo Izy. Tonga amin'ny trinite Izy; Ray, Zanaka, Fanahy Masina. Hitanareo, Kristy iray ihany io rehetra io, Andriamanitra iray ihany, tamin'ny fotoana rehetra. Eny, fantatsika fa tonga Izy mba hitondra asam-pahasoavana telo; fanamarinana, fanamasinana, batisan'ny Fanahy Masina. Ny zavatra rehetra, ao amin’Andriamanitra, dia feno ao amin'ny telo.

<sup>15</sup> Koa dia tonga Izy, voalohany, mba hanavotra ny Ampakariny. Tonga Izy, faharoa, ho amin'ny Fampakarana, mba hampakatra ny Ampakariny. Tonga Izy, fahatelo, miaraka amin'ny Ampakariny, Mpanjaka sy Mpanjakavavy; avy eo, dia ilay fotoana iandrasan'ny olona maro ilay Fihaviany.

Saingy rehefa tonga Izy amin'io fotoana io, tena tsy misy af-atsy ireo izay vonona no hahafantatra hoe rahoviana Izy no ho tonga. Fa hisy olona tsy ho eo fotsiny. Tsy ho fantany izay nanjo azy ireo. Hakarina fotsiny izy ireo, vetivety, dia lasa tsy hita fotsiny izao. “Hovàna vetivety, ao anatin’ny indray mipi-maso.” Koa mivonona fotsiny ho amin’izany. Ho maraina anankiray mahatsiravina izany tsy hahitana ny olon-tiana

izany, tsy misy afaka ny hahita azy ireo. Tsy ho zavatra tena ratsy ve ny fahalalana hoe efa lasa izany nefà ianao diso an'ilay izy? Koa mitoera hatrany eo anatrehan'Andriamanitra.

<sup>16</sup> Ankehitriny, amin'ny herinandro manaraka, raha sitraky ny Tompo, ny Alatsinainy heriny, ny Alatsinainin'ny herinandro manaraka, raha sitrak'Andriamanitra, dia hitondra ny fianakaviako hiverina any Arizona aho fa any izy ireo no hianatra, avy eo izaho—izaho vao hiverina.

<sup>17</sup> Ankehitriny, tsy ho any aho...Tsy misy fivoriana ataoko any. Matetika aho no tsy ao Arizona. Mankany any amin'ny toeran-kafa aho. Entiko any ny vadiko, ny Alatsinainy manaraka. Dia hiverina eto indray aho. Hiala avy eto aho ary ho any British Columbia. Miverina ao Colorado aho. Ho ao Arizona indray aho matetika rehefa akaiky Krismasy, fotoana vitsy ihany, tsy ampy...angamba roa na telo andro, hanangonana ny fianakaviana, ary hiverina eto mandritra ny fialàn-tsasatry ny Krismasy, raha sitraky ny Tompo, ka hanao fivoriana eto mandritra ny herinandron'ny taom-baovao.

<sup>18</sup> Arak'izany aho dia eto, matetika, no betsaka. Im-polo lavitra noho ny any ivelany any aho no eto, satria isika tsy manana fiangonana na fivoriana any ivelany any, tsy misy zavatra ananantsika any ivelany any, arak'izany, ny amin'izay hoe fivoriana ao am-piangonana. Izay no zavatra ratsy ny amin'io. Tsy manana toerana handefasana ny ankizy aho mba handrenesany an'ireto Hafatra ireto, toy ny andrenesan'ny zanakareo an'izany eto, ary—ary izay no hany banga eo aminay. Nefa salama tsara izy rehetra. Maina ny any, mafàna, toetr'andro maina, nefà toy ny salama ny fahitana ny ankizy rehetra. Tsy maharitra ny fotoana hijanonako any mba hahalalako na mahasalama ilay izy na tsy mahasalama. Izaho, izaho mifindrafandra foana, sady izaho—izaho—izaho mihevitra fa teraka ho mpitety faritra aho.

<sup>19</sup> Niantso ahy ny vadiko...Fantatro fa eto izy, koa ho azoko io aorian'ny fiangonana, fantatrareo rehetra izany. Inona no iantsoana an'izany, rivotra miovaova, na rivotra tsy mipetraka, na inona koa—inona koa, fantatrareo, fasika miovaova? Fa, mifindrafandra foana aho, amin'ny fiteny hafa. Ary manambady aho izao, roa amby roa-polo taona izay, nefà indraindray aho mihevitra fa vahiny aho ao an-trano, satria tsy maintsy mandeha aho.

Nefa miandry an'ilay fotoana aho izay hipetrahantsika ao amin'ilay Tanindrazana indray andro any. Fa ankehitriny dia misy ny ady, noho izany dia aoka isika hivavaka.

<sup>20</sup> Aza adino, amin'ny Alahady heriny maraina, raha sitraky ny Tompo, ento ireo mararinareo sy ny marofy. Tongava aloha, makà toerana, fa mety hisy andiany hivavahana amin'io. Tsy maintsy mizara karatra

fangataham-bavaka isika. Raha tsy ampy izany, dia tsy hizara karatra fangataham-bavaka isika, mba hanaovana laharam-bavaka kely fotsiny roa na telo amby folo, na toy izany. Nefa isika—isika dia mety hizara karatra fangataham-bavaka, koa mety ho ora iray alohan'ny fivoriana mahazatra no hanaovan-tsika izany, izay neveriko fa hanomboka...Ho amin'ny valo izany, valo na valo sasany, no hizaran'izy ireo ny karatra fangataham-bavaka; sokàfy ny fiangonana, zarao ny karatra fangataham-bavaka amin'ny Alahady heriny maraina. Koa manàna antoka ny ho eto ho an'ireo...Ento ireo malalanareo, apetraho eto izy ireo. Fa ho tsara sy mangatsiatsiaka ato amin'ny fiangonana, raha marary izy ireo, ary hataonay izay rehetra azonay atao hivavahana ho azy ireo.

<sup>21</sup> Misaotra anareo, indray, ny amin'ilay fanati-pitiavana.

<sup>22</sup> Ary hamaky Tenin'Andriamanitra vitsy isika ankehitriny, izao hariva izao, ka mivonona ny amin'ity fotoan'ny Fanatrehany indray ity mba hitondrana ny Teniny. Eny, fantatsika fa afaka mamaky lahateny iray isika, saingy Andriamanitra no tsy maintsy hanambara ny heviny. Hitanareo? Afaka maka lahateny iray isika, saingy Andriamanitra no tsy maintsy hanambara ny heviny. Koa raha eo am-pamadihana ianareo ankehitriny ao amin'ny Bokin'ny Jeremia eto, toko faha 2.

<sup>23</sup> Tiako ny hilaza fa faly aho manana, miaraka amintsika, an-dRahalahy Lee Vayle, rahalahy malala ao amin'ny Tompo. Ataoko fa itsy, ilay rahalahy itsy, tsy tsaroako ny anarany, Rahalahy Willard Crase. Ary nahita an'ireo rahalahy avy any Arkansas aho, Rahalahy John sy ny hafa, avy any amin'ny Poplar Bluff, sy Rahalahy Blair. Ary, oh, Rahalahy Jackson, sy Rahalahy Ruddell, ary maro tokoa ka izaho—izaho tsy mahavita...Iriko ny hiantso ny anaran'ny tsirairay, saingy tsy vitako fotsiny ilay izy, ary azonareo. Rahalahy Ben Bryant, hitako mipetraka itsy izy; matetika dia izy no amena ho ahy etsy anjorony rehefa izaho...Ny rehetra dia mahafantatra an'i Ben amin'alalan'ny feony. Ho-hoh.

<sup>24</sup> Izahay, nitoetra tany California indray andro, nitory Hafatra iray ho an'ireo olona Batista tao amin'ny lohasaha aho. Nanana trano-lay lehibe izy ireo tany, sy karazana Batista aristokraty maro. Tsy nandre "ameña" anankiray mihitsy aho na taiza na taiza; fantatrareo, natahotra ireo vehivavy sasany ny hanimba ny loko teo amin'ny tarehiny. Avy teo, ny zavatra voalohany fantatrareo, nahita tongotra roa tahaka *izao* aho, niakatra ambony, sy tànana lehibe roa, sy volo mainty nipoitra teo, nihika, "Amena," nikiakiaka toy izany. Dia njery tery ambany aho, hoy aho hoe, "Ben, avy taiza ianao?" Tena azony mihitsy ilay "ameña."

<sup>25</sup> Hitako ny vadiny mijery azy, kely fotsiny. Fa, efa mihintsana kely ireo volony mainty sasany, nefà tsy maninona izany, fantatrareo. Aza manahy ny amin'izany. Izaho koa, ny ahy, efa ela izay.

Koa, ankehitriny, aza adino ny mivavaka.

<sup>26</sup> Ankehitriny raha hiditra amin'ny ampahany matotra amin'ny fivoriana isika izao, tsarovy, fa raha mamaky an'ity Teny ity isika, dia hitahy ny Teniny Andriamanitra. "Tsy hiverina Aminy foana Izany, fa Hanatanteraka an'izay nanirahana Azy." Ary fantatro, eo am-pamakiana ny Teny, dia ho marina hatrany aho. Rehefa vakiko ny Teny, dia hanaja ny Teniny Andriamanitra.

<sup>27</sup> Ndeha isika hitsangana am-panajàna ho an'ny Teniny Jeremia, ny toko faha 2, ny andininy faha 12 sy ny 13 amin'ny Jeremia 2.

*Talanjona, O...ry lanitra, ny amin'izany, ary matahora tokoa, ka mangorohoroa indrindra, hoy ny TOMPO.*

*Fa zava-dratsy roa loha no nataon'ny oloko; efa nahafoy ahy loharanon'ny rano velona izy, ka nihady famorian-drano ho an'ny tenany, famorian-drano mitriatriatra, izay tsy mahatana...tsy mahatan-drano.*

Hanondrika ny lohantsika isika izao.

<sup>28</sup> Andriamanitra malala, novakiana ny Teninao. Ary mangataka izahay mba Hanajanao an'izany Teny izany ka hanome anay izao hariva izao ny endrika na izay mifanitsy amin'Izany; raha mijery ny fotoana fahiny izahay, Isiraelly, ho ohatra, araka ny nampianarin'ny Baiboly anay fa afaka mahita ny Nataonao tamin'izy ireo izahay rehefa nankatoaviny ny Teny, mahita ny Nataonao tamin'izy ireo rehefa tsy nankatoaviny ny Teny, ary mianatra an'izay tsy maintsy ataonay. Koa, mangataka izahay ny Hiresahanao aminay izao hariva izao amin'ny fomba tena miavaka tokoa, mba ahafantaranay hoe ahoana no hitondranay ny tenanay amin'izao andro izao, fa mianatra izahay tamin'ny maraina teo fa ao amin'izany izahay no miaina. Fa amin'ny Anaran'i Jesosy no angatahanay izany. Amena.

Afaka mipetraka ianareo.

<sup>29</sup> Te-hiresaka aho izao hariva izao ny lohahevitra, mandritra ny-ny fotoana fohy: *Famorian-drano Mitriatriatra*.

<sup>30</sup> Nanao zava-dratsy roa lehibe ny Isiraelly. Nilaza Andriamanitra fa niala Taminy izy ireo, ilay Loharanon'Aina, ka nihady famorian-drano ho an'ny tenany hisotroana. Eny, zavatra tokoa izany.

<sup>31</sup> Ny antony niheverako an'ity lahateny ity dia satria hifanitsy tsara amin'izay nolazaiko tamin'ny maraina io izany, ny amin'ny ora izay iainantsika, sy ilay Antony izay itolomantsika.

<sup>32</sup> Ary mijery ny Isirael toy ny ohatra isika, fa, izay naha-izy an'Andriamanitra, dia mijanona toy izany foana Izy. Ary misy zavatra tokana izay najain'Andriamanitra hatrany, dia izao, ny Fombany izay efa Nomaniny ho an'ny olona. Ka rehefa mivoaka amin'io fomba io izy ireo, dia tsy voahaja Andriamanitra, ary ampahorian'Andriamanitra ny olona noho ny nialàny tamin'ny fomba izay efa Nolazainy taminy fa hatao, na inona izany na inona.

Nomeny lalàna mihitsy aza izy ireo, "Aza màka, aza mikasika, aza manandrana." Tsy hoe noho ilay faharatsian'ny fanaovana an'ilay izy fotsiny, fa ilay faharatsian'ny tsi-fankatoavana an'izay Nolazainy hatao. Ary tsy misy afaka ny ho lalàna raha tsy misy ny famaizana noho ny lalàna. Satria, raha tsy misy ny famaizana, dia, tsy manan-kery ny lalàna raha tsy misy ny sazy izy. Ny lalàna!

<sup>33</sup> Ankehitriny, hitantsika, fa izay nataon'izy ireo tamin'io andro io dia toa mifanitsy amin'izay ataontsika ankehitriny, izay ataon'ny olona ao amin'ny fiangonana.

<sup>34</sup> Ankehitriny dia mahita zavatra hafahafa isika eto. Mety ho hafahafa amin'ny olona sasany izany, raha nilaza Izy hoe, "Ianareo dia, izy ireo dia, nihady famorian-drano ho an'ny tenany, famorian-drano mitriatriatra." Ankehitriny, angamba ny sasany aminareo tsy mahafantatra hoe inona izany famorian-drano izany. Firy no mahafantatra hoe inona izany famorian-drano izany? Eny, ny ankamaroanareo. Raha nobeazina tao amina toeram-piompiana anankiray ianareo, dia fantatrareo hoe inona izany famorian-drano izany. Tadidiko fa efa nahasotro bibikely maro avy tamin'ny anankiray aho, mba—mba hahafantaroko hoe inona izany—izany famorian-drano izany.

Nitory tany ambanivohitra tany aho izay, tany anaty ala iray, izay nisy dobo lehibe famorian-drano nisy rano teo, avy amin'ny—ny orana, fantatrareo, ary karazany efa tranaindy ilay izy. Ary—ary avy eo ireo bibikely, amin'ny alina, dia niditra tao anatiny. Ary toy izany no nahafantaroko izany hoe famorian-drano misy rano izany.

<sup>35</sup> Ny—ny famorian-drano dia—dia toerana, zavatra lavahana ao amin'ny tany, mba ho solon'ny fantsakana. Rehefa tsy manana fantsakana ny olona, dia manao ny—ny famorian-drano. Amin'ny fiteny hafa, ny famorian-drano dia fitoeran-drano nataon'olombelona na fantsakana nataon'olombelona ao anaty tany, izay nangadian'ny olona, mba hahazoana rano, mba—mba hampiasana azy. Ny sasany amin'izy ireo mampiasa izany ho

rano fanasana, ary ny sasany mampiasa izany ho rano fisotro, sy fomba hafa, angamba. Ny rano rehetra indray mandeha, ilay azontsika fahiny, dia tao amina famorian-drano anankiray. Nisy zavatra tranainy anankiray tsy maintsy nahodinareo, ahodina, ahodina, ahodina, mba hampiakatra rano; misy siny kely eo aminy, mba hisintonana ny rano avy ao amin'ilay famorian-drano.

<sup>36</sup> Eny, mahatsikaritra zavatra anankiray isika mikasika ny famorian-drano izay misy fahasamihafany amin'ny fantsakana. Eny, ny famorian-drano dia mety ho ritra. Ny—ny—ny famorian-drano tsy afaka mameno ny tenany. Izany dia—dia... Tsy azo hiantehlerana izy io. Tsy afaka ny hiantehitra amin'ny famorian-drano ianareo. Fa miantehitra na miankina amin'ny orana milatsaka amin'ny fahavaratra na ririnina izy io, na inona na inona ny... Matetika, amin'ny andro ririnina rehefa tonga ny oram-panala sy ny orana, dia izay no mitondra rano ao amin'ilay famorian-drano. Fa raha tsy mahazo an'io rano io izy, amin'izay ianareo—ianareo dia tsy banana rano mihitsy. Izy io dia tena—izy io dia tena... ritra. Ary tsy mahay mameno ny tenany izy io. Ilay famorian-drano tranainy dia tsy mahay mameno ny tenany. Izy io dia mandray ny famenoany avy amin'ny—ny orana izay milatsaka.

<sup>37</sup> Ary tiako hahatsikaritra zavatra hafa anankiray ianareo mikasika ny famorian-drano. Matetika, mahita ianareo, na ny zava-nisy tany aminay, ilay famorian-drano... Matetika ny trantom-biby dia indroa lavitra noho ny hahalehiben'ny trano, ary matetika izy ireo no mitarika ny rano avy amin'ilay trantom-biby, ho ao amin'ilay famorian-drano. Tsaroako ilay famorian-drano fantsakana tranainy teny ivelany, rehefa nisy... rehefa ilay—ilay fantsona no nitarika ho ao anatiny, ihany koa, avy amin'ilay trantom-biby. Feno avy amin'ilay trantom-biby ilay izy.

Koa tonga avy eny amin'ny tafon'ilay trantom-biby àry ilay rano; izay, ny biby rehetra no manitsakitsaka eo an-tokontanin'ilay toeram-piompiana, ary ny loton'ilay trantom-borona rehetra dia mitoetra eo an-tampon'ilay trantom-biby, amin'ny main-tany. Ary avy eo dia tonga ny rano ka manadio azy rehetra hiala amin'ny tafo, mankao amin'ny tavy izay nataon'olombelona, avy eo mankao amin'ny fantsona nataon'olombelona, avy eo mankao amin'ny famorian-drano nataon'olombelona. Ka raha tsy fahalotoana anankiray no azonareo, dia tsy haiko hoe inona no anananareo, raha famorian-drano no anananareo. Eny, tompoko! Nataon'olombelona avokoa io rehetra io, ka tena maloto arak'izay mety ho izy.

<sup>38</sup> Fantatrareo, isika taloha niantso... Nanana vorodamba fitatavanana isika teo amboniny. Efa mba fantatrareo ve hoe

inona izany? Nasiana vorodamba fitatavanana teo amboniny, mba hihazonana an'ireo bibikely sy ireo zavatra tonga avy eny an-tampon'ilay—ilay tranom-biby, sy ny manodidina an'ilay toerana, ka niraraka avy tao amin'ny toerana anankiray mankao amin'ny iray hafa, mankao amin'ilay famorian-drano. Ary isika taloha dia nametraka vo—vorodamba fitatavanana anankiray teo amboniny, mba hihazonana an'ireo—ireo loto rehetra sy ny zavatra mety hisy. Mazava fa, tsy hahatazona ny tena fahalotoana izany, ireo vaingana lehibe izay milatsaka sy mianjera eo amin'io ihany no voatazony. Mety tavela eo amin'io ilay bibikely, saingy ny ranon'ilay bibikely kosa dia mankao miaraka amin'ny rano. Koa, ianareo—ianareo dia tena hanana ny tena fahalotoana tokoa raha manana famorian-drano maloto tranainy anankiray.

<sup>39</sup> Afaka andro vitsy, avelanareo hijanona eo io rano io, dia lasa mihandrona izy io. Avelanareo ny rano hijanona ao amin'ny famorian-drano, dia lasa mihandrona izy io. Ary dia lasa feno an'ireo—ireo sahona izy io, sy androngo, ary menarana. Ary izahay taloha niantso an'izy io hoe “tsiboboka,” tena kely... Tsy fantatro raha... Tsy parazita akory izy ireo, izy ireo dia... Tsy haiko, tsy fantattro ny fiantsoanareo azy ireo. Fa zavatra kely mankao anatin'ny rano, izay—izay nantsoinay hoe tsiboboka. Fantatrareo hoe inona izany. Firy no mahalala an'izany lazaiko izany? Oh, tena, eny, ianareo tambanivohitra rehetra dia mahalala. Feno zavatra miandrona izy io, ary dia tonga miaraka amin'izany avokoa ireo mpitia zavatra miandrona. Tonga fotsiny tokoa izany, satria miandrona izy io. Ary satria miandrona izy io, dia manintona ny biby izay tia zavatra miandrona ho eo.

<sup>40</sup> Ary misy fitoviana betsaka amin'ny fiangonantsika ankehitriny izany. Heveriko fa nialantsika... Iray amin'ireo ota lehibe nataon'ny fiangonana ankehitriny, tahaka ny Isiraelny teo, dia ny niala Taminy, ilay Loharanon'ny Rano velona, ka nihady famorian-drano nataon'olombelona ho an'ny tenany. Dia lasa fonenan'ireo zavatra rehetra izay tia an'io karazan-drano io izany. Androngo, sahona, sy ireo karazana mikrôba maloto rehetra, mivelona ao anatiny, satria fitoeran-drano nataon'olombelona ilay izy. Ary ao amin'io fitoeran-drano io no mipetraka ireo zavatra ireo, ohatra tanteraka anankiray ny amin'ireo anaram-piagonantsika ankehitriny.

<sup>41</sup> “Ankehitriny,” hoy ianareo, “Rahalahy Branham, nahoana ianao no mameley mafy an'ireny olona ireny?”

Tsy maintsy velesina mafy izany. Tokony ho velesina mafy izany. Andosiro izany, satria io no hanao ny mariky ny bibi-dia amin'ny farany. Tsarovy, fa izany no Marina! Io no ho mariky ny bibi-dia. Anaram-piagonana no mitarika avy hatrany ho any amin'io. Eo amin'ny lâlany izy io amin'izao ankehitriny izao, mba hanery, amin'ny alalan'ny fahefana anankiray.

<sup>42</sup> Jereo ny tamin'ny fanapahana Romana fahiny. Io mihitsy no nitarika azy ireo tamin'io mariky ny apostazy io. Hitanareo teo fa tsy nisy olona afaka nividy na nivarotra raha tsy nanana ny mariky ny bibi-dia. Tsy maintsy nanana an'io izy.

<sup>43</sup> Kilasin'olona roa ihany no hisy eto an-tany; ireo izay manana ny Tombokasen'Andriamanitra, ary ireo izay manana ny mariky ny bibi-dia. Kilasin'olona roa ihany, noho izany dia tsy maintsy hanana ny iray na ny iray hafa ianareo. Fa ho apostazy anankiray izany, ho-ho mariky ny—ny fivavahana, fivavahana apostazy.

<sup>44</sup> Ary dia hisy ny sarin'ilay bibi-dia. Raha nianatra isika, dia nahita fa Roma izany, izy, sady ho izy foana, ilay mar...na, ilay bibi-dia. Izany tokoa. Tsy misy fomba hafa mety ahazoana an'izany. Roma!

<sup>45</sup> Fa inona no nataon'ny Roma? Nivadika avy tamin'ny Roma mpanompo sampy izy ho Roma papaly, ka nanangana rafitra anankiray, rafitra maneran-tany anankiray, izay nanery ny olona rehetra ho amin'io fivavahana iray io raha tsy izany dia hatao maty.

<sup>46</sup> Ary ny zavatra mahavariana dia ity Etazonia miditra an-tsehatra ity, ary dia tahaka ny zanak'ondry izy. Sady zanak'ondry manana tandroka kely roa, zò sivily sy ara-pivavahana. Ary vetivety teo, fony zanak'ondry izany, dia hitantsika fa niteny tahaka ny dragona izy io ka nampihatraty ny fahefana rehetra nananan'ilay dragona talohany. Ary milaza amintsika ny Baiboly fa hoy izy ireo hoe, "Ndeha isika hanao sary ho an'ny bibi-dia." Ny hoe sary dia zavatra mitovy amin'ny zavatra hafa. Ary hitantsika mihitsy izany ankehitriny, ao anatin'ny fotoan'ny apostaziny izao, fa ny fiangonana dia efa eo am-pananganana ny Fiombonamben'ny Fiangonana Manerantany, izay sarin'ny fahefan'ny Roma; ary hanery ny olona tahaka izay nataon'ny Roma mpanompo sampy...na nataon'ny Roma papaly. Koa, tsy misy fomba hafa, tsy zavatra hafa. Fa izany no Marina.

<sup>47</sup> Ary izay no antony amelezako mafy an'io amin'ny taonako, amin'ny androko, satria tokony velesina izy io. Tonga ny antso, hoe, "Mialà aminy ianareo, ry Oloko, mba tsy hiombonanareo ota aminy!"

<sup>48</sup> Ankehitriny, mampitovy an'izany amin'ireto famorian-drano maloto, feno loto ireto aho. "Izy no Loharanon'Aina. Izy no Rano velona." Nefa miala amin'Io ny olona, ka mihady famorian-drano ho an'ny tenany izay tsy hahazo afa-tsy fahalotoana fotsiny. Izay ihany no zavatra mety hazoniny. Ary izay no ataon'ny anaram-piangonana; hazoniny izay rehetra tonga eo ka te-hikambana. Tian'izy ireo ny handray azy ao rehefa manam-bola fotsiny io na miakanjo amin'ny fomba miavaka. Tsy mampaninona na iza izy ireo na iza, na avy aiza izy ireo, dia raisiny izy ireo, na izany aza.

<sup>49</sup> Hitantsika ankehitriny, indray, fa, io mariky ny bibi-dia io dia naorina teto. Amerika, dia, isa telo amby folo. Teraka niaraka tamin'ny zana-tany telo amby folo izy. Nanana saina izay nisy kintana telo amby folo izy, tsipika telo amby folo. Ary miseho mihitsy aza izy ao amin'ny Apokalypsy toko faha 13. Ary vehivavy anankiray foana i Amerika hatramin'izay, voaseho eo amin'ny volantsika. Na dia ilay loha Indiana mihitsy aza, eo amin'ny vola varahina, dia sarim-behivavy mihorirana anankiray. Fantatsika izany, fantatsika ny tantaran'i. Ny zavatra rehetra, ny Liberty Bell, sy ny maro hafa, ny fahafahana...ny Statue of Liberty dia, ny rehetra, vehivavy. Vehivavy; isa telo amby folo. Hitanareo? Ankehitriny, izany dia—izany dia tena mahafinaritra ny mahita an'ireo zavatra ireo.

<sup>50</sup> Ary ankehitriny aho dia nilaza mialoha tamin'ny alalan'ny fanambarana avy tamin'Andriamanitra, na ny fahitana tamin'ny 1933, fa hitranga ireo zavatra fito ireo alohan'ny andro farany. Ary io, ny iray amin'izany, dia, "Mussolini," izay tonga mpanao didy jadona, "ho tonga mpanao didy jadona izy. Ary, koa, hanao fanafihana ka ho any Etiopia izy, ary haka an'i Etiopia. Ary ny Fanahy, nanao Izy hoe, 'Ho lavo eo amin'ny diany izy.'"

<sup>51</sup> Manontany tena aho raha misy tamin'ireo olona fahiny mbola tavela ato amin'ny tabernakla, ka mahatsiaro ahy nilaza an'izany tao amin'ny Redman's Hall rehefa nitory izahay, efa, efa taona maro lasa. Misy anankiray ve ato amin'ity trano ity, izao hariva izao, izay sisa tavela tamin'ireo izay tao amin'ny Redman's Hall taloha rehefa nitory an'izany aho, fony nivoaka ny N.R.A. izy ireo, tamin'ny fotoana nitondran'i Roosevelt voalohany? Ataoko fa tsy misy anankiray eto. Misy anankiray ve? Hia, hia, anankiray, misy anankiray. Eny, Rtoa. Wilson, tsaroako izy. Ny vadiko, mipetraka itsy aoriania itsy. Roa sisa, avy amin'ilay taranaka fahiny tamin'izany andro izany.

Fa, rehefa nilaza izy ireo fa ny N.R.A. no mariky ny bibi-dia, dia hoy aho hoe, "Tsy misy ifandraisany; tsy misy mihitsy. Tsy avy eto ny mariky ny bibi-dia. Avy any Roma izany. Ary tsy mety ho ny mariky ny bibi-dia io."

<sup>52</sup> Ary tsarovy eto fa voalaza ireo zavatra ireo. Hoe, "Ho tonga eo amin'ny fiafarana mahagaga i Adolph Hitler. Fa hiantsy ady amin'ny Etazonia izy. Ary izy ireo dia hanorina zavatra lehibe—ho—ho zavatra lehibe vita amin'ny simenitra, ka hiaina ao anatin'izany mihitsy aza izy ireo. Ary eo mihitsy no handraisany Amerikana kapoka mahatsiravina, eo amin'io." Ary dia faritra Siegfried izany, iraika amby folo taona talohan'ny nanombohany niorina mihitsy. Ary dia nolazaina hoe, "Fa ho tonga eo amin'ny fiafarana anankiray izy; ka ny Etazonia no handresy amin'ny ady."

<sup>53</sup> Ary dia nolazaina hoe, fa, "Misy isma telo; Nazisma, fasisma, ary kominisma." Dia hoy aho hoe, "Hifarana ao amin'ny kominisma izy rehetra. Ny Rosia no haka an'io rehetra io, ao amin'ny kominisma."

<sup>54</sup> Dia hoy aho hoe, "Fa hivoatra tokoa ny siansa, hanan-tsaina tokoa ny olona, ka hamorona zavatra maro izy hany ka hanamboatra fiara mitovy amin'ny atody izy, izay hisy toy ny fitaratra eo an-tampony, ary hery hafa noho ny familiana no hitondra azy." Efa ananan'izy ireo ilay fiara.

<sup>55</sup> Dia hoy aho, "Ary ny fitondran-tenan'ny vehivavintsika dia hitotongana ho amin'ny zavatra mahatsiravina, ka hahatonga azy ireo ho henatra ho an'ny firenena rehetra. Hanao fitafian-dehilahy izy ireo. Hanala hatrany ny fitafiany izy ireo mandra-pahatonga azy toy ny manao ny atin'akanjony sisa, dia izay. Ary, ny hiafarany, dia ho avy izy ireo hitafy ravina aviavy fotsiny sisa."

Ary raha mahatsikaritra ianareo, tao amin'ny magazina *Life* tamin'ny volana lasa, nisy an'ilay vehivavy nanao ravina aviavy teo aminy. Ary izany no akanjo takariva vaovao, na akanjo milobaloba, izay fitondran'izy ireo amin'ny hariva; mangarahara, ahitana ny ao anatin'y, ilay ravina aviavy fotsiny no manafina kely amin'ny vatany; sady tsy mifatotra, na mifatotra, akanjo filomanosana tsy mifatotra, ny eo ambonin'izany, mampiseho vatana. Fa toy inona ny efa isehoan'ireo zavatra ireo!

<sup>56</sup> Dia hoy aho hoe, "Nahita vehivavy anankiray aho nijoro tao Etazonia, toy ny mpanjakavavy lehibe na tahaka izany. Ary tsara tarehy ny fijery azy, nefo ratsy ny tao am-pony. Ary izy no nanao ny dian'ny firenena, handeha hanaraka ny diany."

<sup>57</sup> Dia hoy aho hoe, "Farany, niteny ahy hijery Atsinanana indray Izy. Ary, rehefa nataoko izany, dia nahita aho, tahaka ny hoe, ny nisy teo, nipoaka izao tontolo izao. Ary hatreny amin'ny faran'izay hitako, dia tsy nisy afa-tsy tapa-kazo, ary—ary ireo vatolampy nanetroka no nibontsina avy tao amin'ny tany."

Ary ireo no hitranga alohan'ny fiafarlan'izao tontolo izao. Ary ny dimy tamin'ireo fito ireo no efa nitranga, tao anatin'ny telo amby telo-polo taona. Eo àry isika izao, tonga amin'ny andro farany!

<sup>58</sup> Fa niteny nanohitra an'io rafitry ny anaram-piangonana io tokoa aho tamin'izay. Ary mbola mino aho, izao hariva izao, fa ranom-potaka izany, toerana izay iangonan'ny fahalotoana ao anatin'y. Tsy azoko inoana hoe Andriamanitra no haka zavatra toy izany mihitsy ho ao amin'ny Fianganany, satria tsy maintsy ateraky ny Fanahin'Andriamanitra izany sady voadio alohan'ny iantsoana an'io hoe Azy. Ilay Vatana mahagaga an'i Kristy, natao batisa ho ao amin'Izany isika tamin'ny alalan'ny batisan'ny Fanahy Masina.

<sup>59</sup> Eny, io rafitra famorian-drano io dia azo antoka fa ohatra tanteraka ny amin'ny anaram-piangonana. Ny olon-kendry dia tokony hijery, ka tsy hiditra ao amin'izany mihitsy, satria efa nopofoin'Andriamanitra tamin'ireo taona rehetra fa nanohitra an'izany Izy sady tsy mbola nifampiraharaha tamin'io mihitsy. Tsy nisy andiany... Isaky ny misy lehilahy nitsangana niaraka tamin'ny hafatra anankiray, tahaka an'i Luther, Wesley, sy ny sisa, sy Smith, sy Calvin, ary ny hafa; rehefa nanomboka nanao rafi-pandaminana izy ireo, dia nataon'Andriamanitra an-kilabao io zavatra io ary tsy novangiana intsony tamina fifohazana.

<sup>60</sup> Jereo manerana ny tantara. Tsy mbola nisy mihitsy fotoana anankiray nakan'Andriamanitra anaram-piangonana iray, ka namoahany fifohazana avy amin'izany, na taiza izany na taiza. Noho izany, manerana ny tantara sy araka ny Baiboly, dia manaporofo fa zavatra maloto eo imason'Andriamanitra io, koa tsy tiako ny hifampiraharaha amin'io. Ary izay no antony hanoherako. Miezaka ny hamoaka ny olona hiala ao aho.

<sup>61</sup> Nasaina isika, tahaka ny tany Isiraely, dia toy izany koa ankehitriny, mba hijery ny Isiraely ho ohatra. Izy ireo, tamin'ny fotoana rehetra nijanonany teo amin'io Loharano io, dia nety tsara izy ireo. Fa rehefa nandeha nihady famorian-drano ho an'ny tenany kosa izy ireo, rafitra nataon'olombelona, dia navelan'Andriamanitra ho fisaka teo izy. Toy izany koa no Hataony amintsika. "Nahafoy Azy izy ireo, ilay Loharanon'ny Rano velona." Izay no fiampangana nanoheran'Andriamanitra azy ireo. "Mba hanaovany zavatra izay ahafahany milaza hoe, 'Hitanareo ve ny zavatra nataonay!'"

<sup>62</sup> Ankehitriny, tamin'ny andron'ny—ny fivahinianan'i Mosesy; Andriamanitra rehefa, tamin'ny fahasoavana, nanome mpaminany ho azy ireo, nanome Andry Afo ho azy ireo mba handeha eo alohany, nanamarina an'Izany tamin'ireo famantarana sy fahagagana. Ny fahasoavana no nanomana an'izany zavatra rehetra izany. Nefa mbola nitady ihany ny Isiraely, nahita lalàna. Nolavin'izy ireo ny fahasoavana, hakany lalàna.

Izany indrindra no ataon'ny olona ankehitriny. Lavin'izy ireo ny Teny, hakany rafitra anaram-piangonana iray, satria ao amin'izany no ahafahany manao izay tiany atao sy milamindamina miaraka amin'izany. Saingy tsy azonareo atao ao amin'i Kristy izany! Mila tonga madio sy mazava ianareo, ara-dalàna ho ao amin'i Kristy.

<sup>63</sup> Niala tamin'ny fantsakana mamoaka rano, ho amin'ny rafitra nataon'olombelona na famorian-drano, azonareo eritreretina ve ny olona manao an'izany? Azonareo eritreretina ve ny toe-tsain'ny olona anankiray izay nisotro avy amin'ny

fantsakana mamoaka rano mamy, nefà niala tamin'io mba ho eo amin'ny famorian-drano nataon'olombelona misy sahona, sy androngo, sy tsiboboka, ary ny maro hafa koa ao anatiny?

Tahaka ny tsy mety izany raha amin'ny fandinohana, nefà dia izay marina mihitsy no nataon'ny olona. Nialan'izy ireo ny Teny, ilay tena Loharanon'ny onin'Andriamanitra sy ny Heriny, mba histroany avy ao amin'ireo famorian-drano, sy hanao famorian-drano ho an'ny tenany. Toy izay nataon'izy ireo tamin'izany, no ataon'izy ireo ankehitriny. Milaza izy ireo...

Hoy Izy, "Niala Tamiko izy ireo." Eto Izzy nilaza, eto amin'ny Jeremia 2:14, na 13, no izy. Hoy Izy, "Niala Tamiko izy ireo, ilay Loharanon'ny Rano velona."

<sup>64</sup> Ankehitriny, hitantsika hoe inona no famorian-drano. Hitantsika hoe inona no azony. Hitantsika hoe ahoana no nanaovana azy. Zavatra nataon'olombelona izay avy any amin'ny tafo maloto izany. Ilay rano izay milatsaka, dia midona amin'ilay tafo maloto, ary manasa an'ilay tafo fotsiny izy, dia mametraka an'izany amin'ny alalan'ny fitatazan-drano nataon'olombelona, amin'ny alalan'ny fantsona nataon'olombelona, mankao amin'ny fitoeran-drano nataon'olombelona. Dia mitangorona ao daholo ny fahalotoana rehetra, sy ny—ny mikrôba, sy ny androngo, ny sahona, sy ireo zavatry ny tany rehetra, tahaka izany. Ary, mariho, fa biby maloto izy ireo; tsiboboka, mihandrona. Ny tsiboboka tsy afaka mivelona ao anaty rano madio. Raha manao izany izy, dia hamono azy izany. Tsy maintsy ao amin'izay mihandrona izy.

<sup>65</sup> Ary izay no mahazo an'ireo parazita maro ireo ankehitriny. Tsy afaka mivelona ao anaty rano mamin'ny Fanahy Masina ianareo. Izay no antony anoheran'izy ireo fatratra ny Teny, ka manao hoe, "Mifanohitra Ity. Tsy misy dikany Ity." Satria tsy maintsy manana karazana dobo mihandrona izy ireo mba hitsibobohany ao. Marina.

Toy izany koa ny amin'ireo sahona, sy ireo androngo, ary ireo bibikely, sy ny torak'izany. Mila mankeo amin'ny heniheny na dobo mihandrona izy ireo, mba hivelona, satria efa natiorany ny mivelona ao. Ary tsy mahay manova ny biby ianareo raha tsy ovanareo ny natiorany.

Ary tsy mahay manao ny olona hahita ny Tenin'Andriamanitra ianareo mandra-pahatongan'ny natiorany hiova; sy rehefa novaina ny natiorany avy amin'izay maha-izy azy, ho zanak'Andriamanitra, ka miditra ao aminy ny Fanahy Masina. Ilay Fanahy Masina no nanoratra ny Tenin'Andriamanitra!

<sup>66</sup> Niresaka tamin'ny sakaizako mahafinaritra aho androany, Mpampianatra Lee Vayle, izay manatrika eto ankehitriny. Ary teolojiana tokoa izy, ary matetika izahay no manana—manana adi-hevitra kely tsara ny amin'ny Soratra Masina. Tena kinga saina.

Ary nanontany ahy izy indray mandeha hoe ahoana no fiheverako ny amin'ny fanamarinana voalohany ny Fanahy Masina, “Ny miteny amin’ny teny tsy fantatra ve izany?” Efa taona maro lasa izany.

Hoy aho hoe, “Tsia; tsy izay no hitako.”

Hoy izy hoe, “Izaho mihitsy koa,” hoy izy, “na dia izany aza no nampianarina ahy.” Hoy izy hoe, “Inona no neverinao ho fanamarinana anankiray?”

<sup>67</sup> Hoy aho hoe, “Ny fanamarinana tsara indrindra azoko neverina dia ny fitiavana.” Koa dia niresaka ny amin’io izahay.

Ary noheveriko ho tsara renesina izany ka dia nitana an’io aho, “Raha manana fitiavana ny olona.”

Fa indray andro ny Tompo, tao amin’ny fahitana, nanitsy ahy. Nilaza Izzy, fa, “Ny fanamarinana ny Fanahy dia ireo izay afaka handray ny Teny,” tsy ny fitiavana mihitsy, na miteny amin’ny teny tsy fantatra, fa ny mandray ny Teny izany.

<sup>68</sup> Avy teo nilaza tamiko Mpampianatra Vayle, fa, “Ara-tSoratra Masina izany,” hoy izy hoe, “satria, ao amin’ny Jaona 14, hoy Jesosy hoe, ‘Raha tonga eo aminareo Izzy ilay Fanahy Masina, dia Izzy no haneho an’ireo zavatra ireo aminareo, dia izay Nampianariko anareo, ary hanambara aminareo ny zavatra ho avy.’”

Koa izay no tena fanamarinana ny Fanahy Masina! Tsy mbola nilaza zavatra diso tamiko Izzy. Fa, “Izao no fanamarinana ny Fanahy Masina, dia izay afaka ny hino ny Teny.” Azonareo raisina Izany.

Satria, tsy nilaza mihitsy Jesosy hoe, “Raha tonga ny Fanahy Masina, dia hiteny amin’ny teny tsy fantatra ianareo.” Tsy nilaza mihitsy Izzy hoe, tonga ny Fanahy Masina, dia hanao an’ireo zavatra hafa ireo ianareo. Fa hoy Izzy hoe, “Izzy handray avy amin’ny Ahy ka hanambara izany aminareo, ary ireo hanambara aminareo ireo zavatra ho avy.” Koa izay no tena fanamarinana ny Fanahy Masina, araka an’i Jesosy Izzy tenany.

<sup>69</sup> Koa ireo fihetseham-po rehetra sy ireo zavatra izay ananan’ny olona sy mbola ivelomany, dia hitanareo hoe nahoana izy ireo no manao izany. Hitanareo, tonga anaram-piagonana anankiray ilay izy, na dobo mihandrona, ary hisy anaram-piagonana mihitsy atao eo ambonin’ny tsi-...ny Tenin’Andriamanitra tanteraka. Tsy vitany izany, satria tsy azonareo omena anarana na anaram-piagonana Andriamanitra. Tsia, tompoke!

<sup>70</sup> Ity no antony, makà ianareo andian’olona izay mino ny Teny, avelao izy ireo hanomboka rafim-pandaminana anankiray. Ny zavatra fantatrareo voalohany, ao anatin’ny taona iray dia misy andiana Rickies ao izay tsy hisy na inona na inona azonareo atao aminy. Izzy ireo no manapaka, ka tsy

misy na inona na inona azonareo mikasika izany. Tsy izany no rafitr'Andriamanitra. Tsy izany, fantatsika izany fa tsy izy izany zavatra izany. Lasa famorian-drano izany, ary lasa toerana izay hanaovan'ny tsirairay marimaritra iraisana amin'ity, itsy, na ny *hafa*, mba ahazoana mpikambana ao anatiny, na hamela ny olona hiditra.

<sup>71</sup> Hitantsika eo, fa nanomboka io rafitra io indray mandeha, tamin'ny andron'ny Isiraelita, raha nihady an'ireto famorian-drano ireto izy ireo. Ary indro nisy lehilahy sy andiana Fariseo nihady famorian-drano vitsivitsy. Ary nanana lehilahy izy ireo natao hoe Heroda, izy no mpanapaka, governoran'ny fanjakana.

Ary tonga izy mba hihaino lehilahy anankiray izay tsy niaraka adala tamin'ireo anaram-piangonan'izy ireo. Mpaminany izy io. Ary tsy mbola nisy mpaminany nifampirahara tamin'ny anaram-piangonana mihitsy, fa halany izany. Nanomboka nilaza ity mpaminany ity hoe, "Aza manao anàkampo ianareo hoe, 'Manana an'i Abrahama ho rainay izahay,' satria lazaiko anareo fa Andriamanitra mahay manangana zanaka ho an'i Abrahama avy amin'ireto vato ireto."

<sup>72</sup> Nandefa manan-kaja anankiray izy ireo mba hihaino azy. Ary ity manan-kaja ity naka ny vadim'ny rahalahiny, ka nanambady azy. Koa inona no nataon'io lehilahy nandeha teo anatrehany io sy izay nolazainy? Noheverin'izy ireo fa hanao marimaritra iraisana izy, ka hanao hoe, "Eny, tompoko, ianao, ianao maka toerana tsara eto io. Ary ianao tokony... Tena faly aho fa eto ianao mba hihaino ahy androany."

Nandeha teo anatrehany avy hatrany Jaona, ka nanao hoe, "Tsy ara-dalàna ny nakanao." Ny zavatra voalohany indrindra nolazainy, dia ny niteny mafy azy noho ny otany.

<sup>73</sup> Hitanareo, manao dobo mihandrona ny anaram-piangonana izay ahafahan'ny lehilahy miara-miaina amin'ny vehivavy maro, ary ny vehivavy afaka manohy fotsiny, sy manapaka ny volony, ary manao sorta, sy ny maro hafa koa, nefia miantso ny tenany ho Kristiana.

Fa ny tena Loharano, haleloia, avy amin'ny Herin'Andriamanitra, dia tsy afaka ny hijanona eo izy, satria hanosika an'io hivoaka Izany. "Izaho no Loharanon'ny Rano velona. Niala Tamiko izy ireo, mba hihady famorian-drano ho an'ny tenany."

<sup>74</sup> Kanefa, ny loharanon'ny rano velona anankiray, hitantsika teo, inona moa ny loharanon'ny rano velona? Hitantsika teo hoe inona ilay famorian-drano, ankehitriny dia inona ny loharanon'ny rano velona? Fantsakana mamoaka rano izany.

"Fantsakana mamoaka rano, inona izany, Rahalahy Branham?"

Izany dia fantsakana izay avy any ambany foana ka manosika ny ranony hivoaka. Mikoriana lalandava izany. Mameno ny tenany izany. Mamy sy madio foana, fantsakana mamoaka rano, loharanon'ny rano velona. Tsy maty izy io na mihandrona. Velona izy io, misolo hatrany izany, mitondra zava-baovao lalandava, mihetsika, avy any amin'ny loharanony. Misintona ny tahiriny avy amin'ny—avy amin'ny fanambaniny izy, izany dia...mbola loharanon'ny rano velona miboiboika. Manadio ny tenany; madio izany, mangarangarana, rano madio. Mameno ny tenany izy; tsy mila miandry orana ianareo mba hamenoana ny fitoeran-dranony. Miboiboika foana izy, manome malalaka ny ranony. Tsy mila mipaompy azy ianareo, manodina azy, manolana azy, na hampikambana azy. Fa loharanon'ny rano velona fotsiny izy io.

<sup>75</sup> Fantatrareo, raha maka an'ireny famorian-drano trrainy ireny ianareo, dia tsy maintsy hanodina azy dia hanodina azy ary hanodina azy, ka hipaoompy sy ny hafa koa, mba ahazoana kely amin'io rano mihandrona ao io. Hah!

Fa ny Loharanon'ny Rano velona dia manome an'Izany, malalaka, tsy mila paompina, hakambana, zavatra hafa. Oh, faly aho ny amin'io Loharano io! Eny, tompoko!

<sup>76</sup> Tsy mila sivana eo amboniny Io, mba hanala an'ireo parazita. Satria, avy any amin'ny lalina ambany tokoa Izany, any anaty Vatolampy, ka tsy misy parazita any.

Tsy mila manana vorodambam-pampianarana mihantona eo amboniny Io, marina izany, karazana rafitra arak'izao tontolo izao avy amin'ny fahendren'ny anaram-piangonana nataon'olombelona; mba hilaza aminareo, eo anatrehan'ny mpitsabo saina, na afaka ny hitory ianareo na tsia. Tsy mila ny iray amin'ireny vorodamba maloto ireny eo amboniny Io. Hatosiny miala avy hatrany izany vantany vao ataonareo eo. Tsy azonareo atao izany. Fa miboiboika io fantsakana io, lalandava. Raha apetrakereo eo amboniny ireny vorodamba ireny, dia ariany tanteraka eny amin'ny sisiny na eny hafa izany. Tsy manam-potoana ho an'ny vorodamban'ny anaram-piangonana eo aminy izy.

<sup>77</sup> Tsy mila fitatavanana Io, na sivana, tsy paompina, tsy hendratana, tsy zavatra hafa. Fa eo fotsiny Io, miboiboika. Tsy mila miankina amin'ny orana misy io hameno azy. *Orana* dia "fifohazana," ka io Loharano io...Izany ny amin'io Loharanon'Aina io. "Izay itoeran'ny Faty, no hiangonan'ny voromahery." Tsy mila mipaompy fifohazana ianareo; tsy mipaompy na inona na inona ianareo. Ny zavatra tokana ilaina ataonareo dia ny tonga fotsiny amin'ilay Loharano. Fa feno rano tsara foana Izany, rano mamy, sady tsy misy farany ao amin'io. Miboiboika hatrany fotsiny Izany.

<sup>78</sup> Tsy mila mankany amin'ny famorian-drano ianareo, ka hanao hoe, "Eny, raha avy ny orana ka manadio ny tranom-biby, dia hanan-javatra hosotroina isika." Hitanareo? Oadray, oadray! Tsy izany. Io fantsakana mamoaka rano io dia mampiboiboka rano tsara, rano mangatsiatsiaka lalandava. Azonareo hianteherana izy io. Tsy mila milaza ianareo hoe, "Eny, ho any amin'io famorian-drano trainainy io aho. Nisotro avy tamin'io izahay taloha, saingy efa ela izay no tsy nahazoany orana. Lazaiko anao fa, ritra angamba izy io."

<sup>79</sup> Izay no fomban'ny sasany amin'ireny rafitra nataon'olombelona ireny. Afaka miditra ao ianareo, raha manana zavatra lehibe aroso ianareo, fombafomba lehibe fivarotana zavatra, na-na karazan-javatra aroso, lanonana lehibe na zavatra aroso, lalao loto, sy lanonana any ambany rihana, sy ny sisa, dia mety hahita trano feno ianareo.

Saingy na aiza halehanareo any amin'izay misy an'io Loharano miboiboka io, izao foana, eo ny olona no mahazo rano tsara, rano fisotro mangatsiatsiaka. Afaka miantehitra amin'io ianareo! Hoy ianareo, "Folo taona izay no tsy nisy fifohazana teo amin'izy ireo." Raha mivelona amin'io Loharano io ianareo, dia hahazo fifohazana hatrany foana Izy.

<sup>80</sup> Toy ny voalazan'ilay lehilahy Gallois kely. Na, indray andro raha nisy ny fifohazan'ny Gallois, dia nisy an'ireto manan-kaja sasany avy any Etazonia. Ny sasany tamin'ireo Mpampianatra lehibe momba an'Andriamanitra dia nankany Pays de Galles, mba hijery hoe aiza sy ahoana daholo ny momba izany. Ary dia niaraka tamin'ny vozon'akanjony mivadika izy ireo, sy ireo satrony miavaka, ary nandeha teny amin'ny arabe izy ireo.

Ary indro nisy polisy kely teo, nanodinkodina an'ilay tapa-kazo kely teny an-tànanay, sady nisioka, "Teo amin'ny hazo fijaliana no maty ny Mpamorjiko, nitomany teo aho mba hanadiovana ny otako; teo no nasiana Rà ny foko, voninahitra ho an'ny Anarany," sady nandeha teo amin'ny arabe.

Dia hoy izy ireo hoe, "Toa ohatry ny lehilahy mpivavaka ity. Ndeha isika hanontany azy."

Dia hoy izy ireo, "Ramosé!"

Hoy izy, "Eny, tompoko?"

Hoy izy hoe, "Avy any Etazonia izahay eto ireto. Solon-tena izahay. Tonga eto izahay mba hamotopototra an'ilay fifohazan'ny Gallois, araka ny fiantsoana azy. Mpampianatra ny momba an'Andriamanitra izahay, ary tonga eto mba hijery ny amin'izany." Hoy izy, "Tianay ho fantatra hoe aiza ilay fifohazana, ary aiza no hanaovana azy."

Hoy izy, "Tompoko, efa tonga ianareo. Izaho no fifohazan'ny Gallois." Amena! "Ato anatiko ny fifohazan'ny Gallois. Ato no misy an'izany."

<sup>81</sup> Izany no izy rehefa mivelona amin'io Loharanon'ny Rano velona io ianareo. Velona lalandava Izany, miboiboika hatrany hatrany, sy hatrany hatrany. Tsy misy farany ny amin'Io. Tsy hoe, "Ndeha jereo raha mba misy rano, raha mba nahazo orana isika teto vao tsy ela," tsy izany io. Io dia ilay Loharanon'ny Rano velona. Araka ny lazaiko, manome ny Ranony malalaka Izy io.

<sup>82</sup> Tsy mila mametrakà vorodamba eo ambonin'Io ianareo, mba ahitana; vorodambam-pampianarana, ka alohan'ny ahafahana mandefa azy hitory teny, ka ahitana raha manonona tsara ny teniny izy, miteny azy tsara, raha mampiasa ny anarana sy ny mpisolo, sy ny sisa, ary ireo mpamaritra. Maro amin'izy ireo no tsy mahalala akory aza hoe inona izany, saingy mivelona fotsiny eo amin'ilay Loharano kosa izy na izany aza, hitanareo, na izany aza.

<sup>83</sup> Tsy mila miankina amin'ny orana eo an-toerana izany, mba hameno azy, na ny fifohazana eo an-toerana, ho an'izany. Tsy mila manao an'izany izy, satria ny Heriny sy ny Fangarangarany dia ao anatin'ihany. Ao no misy ny Teny, ilay Heriny Manokana! Rehefa afaka handray an'Izany ao am-pony ny olona iray, dia mahazo ny Fangarangarany Izy. Mahazo ny Heriny Izy. Tena ao amin'ny Teny mihitsy Izany, mamoka an'ilay Aina.

<sup>84</sup> Nanalavitra an'Io ny Isirael, dia tratry ny olana izy ireo. Isaky ny nanalavitra an'Io izy ireo, dia tratry ny olana.

Mitovy amin'ny ataontsika ankehitriny. Rehefa manalavitra an'Izany ny fifohazana, dia tsy mahasoa izany. Mihady fantsakana ho an'ny tenany izany, ary, na karazana famorian-drano mihandrona, ary dia vita ny aminy.

<sup>85</sup> Saingy nanampy azy ireo foana Izy. Ny fimonomononana teo amin'ny Ranomasina Mena, raha nimonomonona izy ireo tamin'izany... Kanefa, tamin'izany rehetra izany, dia nampanantena Izy, nanao fampanantenana ho azy ireo. Tokony namerina azy ireo avy hatrany Izy, raha ny fomba fijerintsika azy; saingy nampanantena Izy ny hitondra azy ireo hiampita any.

Inona no Nataony? Ireto zanak'Isirael ireto, nanome azy ireo ny Andry Afo sy ny sisa Izy, ho fanamarinana, ny mpaminaniny. Ary nitarika azy teo amin'ny ranomasina izy ireo. Ary, izay foana, misy olana manohitra an'Io. Dia indro fa tonga Farao sy ny tafiny. Ary fantatrareo ve ny nataon'Andriamanitra? Nosokafany fotsiny io famorian-drano mena, mihandrona io.

Ilay Ranomasina Maty no zavatra maty indrindra eto an-tany. Maty tokoa izy io. Mihandrona izy io. Tsy misy na inona na inona afaka mivelona ao.

Ary Nosokafany izany ary nanafaka azy ireo Izy, ho eny am-pita. Nentiny izy ireo ho eo amin'izay tsy ilainy karazan-javatra mamatotra azy tahaka izany.

<sup>86</sup> Tany an-efitra, hitan'izy ireo fa tsy azony niantehlerana ireo fitoeran-drano; ritra izy ireo. Rehefa hitany, dia niala tamin'ny lava-drano anankiray izy ireo ho amin'ny iray hafa. Fony tany an-efitra izy ireo, dia matin'ny hetaheta, nitady rano hosotroina. Ary nankeo amin'io fitoeran-drano teo io izy ireo, kamory iray; ritra izy io. Nankeo amin'ny toerana hafa izy ireo; ritra izy io. Tsy nieritreritra fotsiny izy ireo hoe mbola hahazo rano anie izy ireo.

Fa tao amin'ny toerana tsy ampoizina indrindra tany an-efitra, no nahitany ilay rano. Tao anaty vatolampy izany. Tao anaty vatolampy izany. Ny toerana tsy ampoizina indrindra hahitan'ny olona rano, dia ny ao anaty vatolampy iray maina ao afovoan'ny an-efitra anankiray. Nefa, hitanareo, toy izany no anaovan'Andriamanitra zavatra. Ao amin'ny toerana tsy ampoizina indrindra, ao amin'ny fomba tsy mahazatra indrindra. Izany foana no azontsika.

<sup>87</sup> Mieritreritra izy ireo hoe tsy maintsy manana anaram-piangonana lehibe ianareo, miaraka, ka hamela azy rehetra ho tonga miaraka sy hanana vahoaka be tsy tambo isaina, sy ny sisa, ka hahazo an'arivony mba hiara-miombona, sy ny sisa toy *izao*, mba hisian'ny fifohazana.

Matetika Andriamanitra dia maka lahy antitra tsy mahalala akory ny ABD-ny, ary eo anivon'ny andian'olona tsy mahay manoratra mihitsy izay tsy mahay manavaka akory ny havanany amin'ny haviany, afaka hanangana fifohazana izay hanozongozona an'izao tontolo izao Izy. Nanao izany Izy tamin'ny andron'i Jaona. Nanao izany Izy tamin'ny andron'ireo mpaminany. Tsy nisy tamin'izy ireo, raha ny fahalalantsika, no mba nampianarina, nefo Andriamanitra afaka nihazona azy ireo ka nanao zavatra niaraka tamin'izy ireo.

<sup>88</sup> Avy tao amin'io Vatolampy io no nivoahan'ny rano. Izy no ilay Vatolampy. Ary Izy no nandidy an'io Vatolampy io, ka tsy maintsy nokapohina. Ary Izy nanome rano betsaka mangaranganana, mamy, madio ho an'ny olona rehetra izay te-hisotro. Namonjy izay rehetra te-hisotro avy Aminy Izy. Mifanitsy tanteraka amin'ny Jaona 3:16 izany.

...*Izao no nitiavan'Andriamanitra izao tontolo izao,  
nomeny ny Zanani-lahy tokana,...tsy ho very izay  
rehetra mino azy, fa hanana fiainana mandrakizay,*

<sup>89</sup> Nokapohin'Andriamanitra izany Vatolampy izany, tao Kalvary. Ny fitsarana antsika dia teo Aminy, mba ho avy Aminy no hivoahan'ny Fanahin'Aina izay hanome Fiainana Mandrakizay ho anareo sy ho ahy. Izay no tena endrik'Izany, tany amin'io an-efitra io.

<sup>90</sup> Tsy nila nisintona mihitsy izy ireo, nihady, nipaompy, na hafa koa; fa mandray anjara fotsiny amin'ilay lâlana efa Nomaniny, maimaimpoana. Fa, tsy nila nihady azy io avy tao

amina kamory anankiray izy ireo. Tsy nila nisintona azy io tamin'ny siny anankiray izy ireo. Tsy nila nanana fanodinana hahazoana azy io izy ireo. Nila nandray anjara tamin'izany fotsiny izy ireo.

Izay ihany koa no misy ankehitriny. Tsy mila mikambana na amin'inona na amin'inona ianareo. Tsy mila miankohoka eo amin'ny alitara ianareo ka hanamboambotra zavatra, hipaoompy an'io. Tsy mila milaza teny anankiray ianareo averina dia averina dia averina, mandra-pahatonganareo hahazo fiteny misavoritaka. Ny zavatra tokana ilaina ataonareo dia ny mandray anjara Aminy fotsiny, maimaimpoana, ilay lèlana efa nomanin'Andriamanitra. Tsy mipaompy, tsy manosika, tsy inona na inona; fa maka an'Io fotsiny, maimaimpoana. Tsy mila manao na inona na inona ianareo; mandray anjara amin'Io fotsiny. Izay no izy, minoa fotsiny an'Io. Izay ihany no azoko lazaina amin'io.

Tsy nila nanao na inona na inona izy ireo ho an'io. Tsy nila nihady ho an'io mihitsy. Tsy nila niankohoka sy nitomany mandritra ny alina mihitsy izy ireo, ho an'io. Nandray anjara tamin'io fotsiny izy ireo; efa nokapohina izy io ary vonona. Marina izany.

<sup>91</sup> Mijery lehilahy iray aho izao, mipetraka iry aorian'ny efitra iry. Tsaroako aho nilaza an'izany taminy, indray andro teo ambonin'ny tranom-biby trainainy anankiray, akaikin'ny fihinanam-bilona.

Dia hoy izy hoe, “Fa tsy tsara aho.”

<sup>92</sup> Hoy aho hoe, “Fantattro fa izany ianao.” Dia hoy aho hoe, “Izaho koa, anie.” Saingy hoy aho hoe, “Ianao mijery izay maha-izy anao. Atsaharo ny fijerenao ny maha-izy anao, ka jereo ny maha-Izy Azy.”

Hoy izy hoe, “Raha mba afaka miala amin'ireto sigara ireto fotsiny aho, Rahalahy Branham, izaho—izaho—izaho dia ho Kristiana anankiray.”

<sup>93</sup> Hoy aho hoe, “Aza miala amin'ireo. Miezaha ho tsara ianao ary avy eo dia manantona Azy. Tsy tonga hamonjy ny olona tsara mihitsy Izy; fa tonga Izy mba hamonjy ny olona ratsy izay mahalala fa hoe ratsy izy.”

Hoy izy hoe, “Eny . . .”

Hoy aho hoe, “Henoy, tsy te ho any amin'ny helo ianao, sa tsy izany?”

Hoy izy hoe, “Tsia.”

<sup>94</sup> Hoy aho hoe, “Eny, tsy mila mankany ianao. Maty Izy mba tsy ahafahanao mankany.”

Hoy izy hoe, “Inona àry no tokony ataoko?”

Hoy aho hoe, “Tsy misy. Tena tsotra fotsiny izany.”

Hoy izy hoe, “Saingy raha mba afaka aho . . .”

<sup>95</sup> Hoy aho hoe, “Io indray ianao, miverina amin’ilay sigara indray. Ajanònny ny fieritreretana an’ilay sigara. Tsarovy fotsiny, eritrereto ny Aminy, izay Nataony, ny maha-Izy Azy; fa tsy izay maha-izy anao. Tsy tsara ianao; ary efa tsy tsara hatramizay ianao, ka tsy ho tsara mihitsy. Saingy, ilay maha-Izy Azy, Izy no Ilay tsara!” Dia hoy aho hoe, “Ankehitriny, ny zavatra tokana ilaina atao; raha nàka ny toeranao Izy tany, dia ekeo an-tsitrapo fotsiny izay Nataony. Ny zavatra tokana ilaina atao dia ny manaiky an’izany fotsiny.”

“Fa,” hoy izy hoe, “tsotra izany. Hataoko izany.”

<sup>96</sup> Hoy aho hoe, “Io misy helodrano.” Hitanareo? Nentiko teo izy ary nataoko batisa tamin’ny Anaran’i Jesosy Kristy.

Misy fianakaviany vitsy mipetraka eto, ary izaho—izaho mahalala fa tsapan’izy ireo ho hafahafa aho nanao an’izany, saingy fantatro ny zavatra nataoko. Nahita zavatra tena izy tao amin’ilay lehilahy aho. Nahita an’izany aho tany, ka nalaiko izy ary nataoko batisa tamin’ny Anaran’i Jesosy Tompo.

Ary, rehefa nataonay izany, tsy ela taorian’izany dia nandeha tany an-tranon’ny zanany aho. Nahita izahay ny—ny fahitana ny amin’ny hazo iray izay tapaka teo amin’ny toerana anankiray, ary lavo ilay lehilahy, saika efa tapaka ny lamosiny. Nentina tany amin’ny hopitaly izy. Ary tamin’io alina io no nanambaran’ny Tompo, tamiko, fa ny fiafaran’ny sigara izany.

Koa ny ampitson’io dia nila sigara. Hoy aho hoe, “Hividy fonosana iray ho azy aho ka ho entiko eo aminy izany. Mijere fotsiny ianareo ka zahao, tapitra ny andron’ny sigarany.” Tsy nifoka intsony izy na iray aza hatramin’io, sady tsy nila intsony izy na dia iray aza hatramin’io. Andriamanitra!

<sup>97</sup> Hitanareo, ny zavatra voalohany tokony atao; dia ny hanatona an’io Loharano io. Mila tonga ho eo amin’io Rano io ianareo, mahatsapa fa tsy misy na inona na inona azonareo atao. Fa izay Nataony ho anareo. Tsy mila mihady ianareo; tsy mila mipaompy ianareo; tsy mila miala amin’ity ianareo; tsy mila miala amin’iry ianareo. Ny zavatra tokana ilaina hataonareo dia ny ho eo ka hisotro. Izay ihany. Raha mangetaheta ianareo; misotroa!

<sup>98</sup> Koa, Izy no ilay Vatolampy. Nokapoka Azy Andriamanitra ho antsika, ka nanome antsika mangarangarana betsaka Izy, rano madio. Mbola manao Izy, ankehitriny, ho an’ny tsirairay izay hino. Izay no Fahasoavany, mazava ho azy, ho an’ny Olony, isika.

<sup>99</sup> Misy zavatra tahaka izany eo, tahaka ny olona ankehitriny, vonona ny handray izay azon’izy ireo raisina, nefo tsy mba vonona ny hanome fanompoana ho valiny. Vonona ny Isiraelny ny—ny hisotro avy amin’ilay vatolampy eto, saingy tsy tian’izy ireo ny hanome an’Andriamanitra ny Fanompoany izay tokony ho Azy.

<sup>100</sup> Nefa manome fanompoana antsika foana Izy. Fantatrareo, isika aza tsy afaka miaina akory raha tsy misy Azy. Tsy afaka miaina isika raha tsy misy ny fanompoan'Andriamanitra. Izay ilay hoe toy ny inona no iankinantsika Aminy. Ary, kanefa, toa saiky mahatapaka roa antsika izany, ny tsy maintsy hanao zavatra ho Azy. Mangataka antsika hanao zavatra Izy, handeha hamangy olona, handeha hivavaka ho an'olona, handeha hanampy olona, toa saiky mahatapaka antsika izany, ny hanao izany. Nefa isika no tsy te-hanao zavatra ho Azy ho fanompoana.

<sup>101</sup> Ny Fitarinanay dia hoe, "Nahafoy Ahy izy ireo, ilay Teny; ka nanaiky famorian-drano mitriatriatra anankiray, ho solony. Nanaiky...Nahafoy Ahy izy ireo, ilay Loharanon'Aina, ilay Loharanon'ny Ranon'Aina; ka niriany sady aleony misotro avy amin'ny famorian-drano mihandrona." Azonareo eritreretina ve izany?

<sup>102</sup> Azonareo eritreretina ve ny olona eto, izay, *eto* misy fantsakana mamoaka rano anankiray tsara, rano misy sokay, avy ao am-pon'ireo vatomampy mihitsy, ao amin'ireto lafika fasika, sy ny sisa, tena mangatsiatsiaka sy tsara arak'izay izy; nefo aleony misotro avy ao amin'ny famorian-drano ery, izay avy nanasa ny tampon'ny tranom-biby, sy ireo fitoeran'entana, ary ireo trano ivelany rehetra manodidina an'ilay toerana? Ary mandefa an'izany avy hatrany ao anatin'io famorian-drano eo io, izay ny rano rehetra mitsika dia mitete mankao, avy amin'ny tranom-biby, ny trano fiompiana sy ny lavarangana, sy izay rehetra mitete dia mankao amin'ilay famorian-drano, nefo tantsika avy eo ny manai-...hisotro amin'izany toy izay ho eo amin'ilay fantsakana mamoaka rano? Misy zavatra ara-pisainana tsy mety ao amin'ilay olona. Marina izany.

<sup>103</sup> Ary raha misy lehilahy na vehivavy haka anaram-piangonana anankiray hifikirany, izay hamela hanapa-bolo, hanao sorta, handoko tarehy, sy ireo karazan-javatra hafa rehetra ireo, sy zavatra kely karazana fa-fandaharam-potoana, sy ireo korontana rehetra ireo, ka afaka mandeha milalao kanetibe, sy-sy ireo fahadalana rehetra any, ary azony leferina izany; ary izany no tiany kokoa noho ilay fomba fahinin'ny Tenin'Andriamanitra izay manapaka sy mandrantsana, ka manao ny vehivavy ho ramatoa, ka manao azy ireo hitafy tsara sy hitondra tena tsara, hanala ny sigara sy ny paraky, sy fiteny ratsy sy ny fanozonana, sy lainga sy halatra, ho lavitra anareo, ary izao tontolo izao ho lavitra anareo, ka hanome anareo Zavatra izay fahafaham-po tanteraka. Nahoana ny lehilahy na ny vehivavy no mandeha amin'ny karazana zavatra toy izany ho fiononana? Ahoana no hahazoanareo fiononana avy amin'izany?

<sup>104</sup> Ahoana no ahazoanareo zava-pisotro mamy avy amin'ny famorian-drano mihandrona anankiray? Nahoana

ny olona...Raha mandeha eo amin'ny famorian-drano mihandrona anankiray ny olona iray mba hisotro, nefo misy fantsakana mamoaka rano misokatra eo, dia hilaza ianareo hoe, "Misy zavatra tsy mety ao amin'ny fisainan'io olona io."

Ary raha vehivavy anankiray na lehilahy anankiray no mandeha eo amin'ny toerana tahaka izany mba hahita fiononana, dia misy zavatra ara-panahy tsy mety amin'io olona io. Tsy mila ny Teny izy ireo. Izany no maneho izany fa ny natioran'izy ireo dia mbola sahona, na bibikely, na ny toy izany, marina izany, zavatra avy amin'ilay natiora izay tia an'io dobo mihandrona io, satria ireo karazan-javatra ireo dia tsy ho velona ao anatin'ny dobon'ny Rano-mamy. Tsy hainy atao izany; Rano mamy io. Tsy hainy atao izany.

<sup>105</sup> Eto, ny fitarainana dia izao, "Niala tamin'lo izy ireo." Ary ankehitriny dia zavatra mitovy amin'izany koa no nataony.

Ankehitriny dia jereo eto ilay vehivavy teo amin'ny fantsakana. Eny, tonga teo amin'ny famorian-dranon'i Jakoba izy, ary naka rano teo foana izy hatramizay, teo amin'ny famorian-dranon'i Jakoba. Nefa ny famorian-dranon'i Jakoba, anaram-piangonana, izay no hiantsoana azy, satria nihady telo tamin'ireo izy; ary isan'ny nangadiany ity. Ankehitriny, nanana tantara lehibe izy. Hoy izy hoe, "Fa, ny razanay no nihady an'ity fantsakana ity, Jakoba. Nisotro tamin'io izy, ny biby fiomphy koa nisotro tamin'io, sy ny sisa. Tsy efa ampy tsara ve izany."

<sup>106</sup> Hoy Izy hoe, "Saingy ny rano izay sintoninao avy ao, mbola hangetaheta indray ianao, ka mila miverina eto indray haka an'io. Saingy," nanao hoe, "ny Rano izay Omeko anao dia Loharano, Zeizera mifantsitsitra avy ao anaty, ka tsy ho avy eto intsony ianao haka Izany. Ao aminao mihitsy Izany."

<sup>107</sup> Mariho. Fa hitany fa ny Loharano ara-tSoratra Masina no niresaka taminy, tamin'ny alalan'ny famantaranana ara-tSoratra Masina izay efa notadiaviny, dia nialany io rafitra anaram-piangonan'i Jakoba io ka tsy niverina teo intsony izy, satria hitany ilay tena Vatolampy. Hitanareo? Nihazakazaka tany an-tanana izy. Vita hatreo ny otany. Tsy vehivavy maloto intsony izy. Hoy izy hoe, "Ndeha, hizaha an'ilay hitako, nisy Lehilahy iray nilaza tamiko an'ireo zavatra izay nataoko. Tsy Izao va no tena Kristy?" Izy...Mety ho nety tsara ilay famorian-drano taloha; nahavita ny asany izy io. Ankehitriny eo amin'ilay tena Loharano izy. Nety tsara ilay famorian-drano mandra-pisokatr'ilay tena Loharano. Saingy rehefa tonga teo ilay tena Loharano, dia very ny herin'ilay famorian-drano. Hitany fa misy toerana anankiray tsara kokoa hisotroana.

<sup>108</sup> Ary misy toerana anankiray tsara kokoa. Misy toerana anankiray tsara kokoa, ary ao amin'i Kristy izany. Ao amin'ny

Masindahy Jaona 7:37 sy 38, hoy Jesosy, tamin'ny faran'ny firavoravoan'ny tabernakely, “Raha misy olona mangetaheta, aoka izy hanatona Ahy, ka hisotro.”

Nifaly izy rehetra. Nanana rano nifantsitsitra kely nivoaka avy tao ambany alitara izy ireo, ary—ary nisotro avy tamin'io izy rehetra, ho fankalazana, ny amin'ny—ny amin'ny firavoravoana. Ary nanao hoe, “Ny razanay nisotro tamin'ny vatolampy fanahy tany an-efitra.” Hitanareo, izy ireo ihany no namboatra famorian-drano ho an'ny tenany, rano mihandrona izay nopaompina avy tany ho any, ka nifantsitsitra teo ambanin'ilay alitara teo io. Ary nitangorona teo amin'io rano io izy rehetra ka nisotro, ary nanao hoe, “Taona maro lasa izay, dia nisotro tany an-efitra ny razanay.”

Hoy Jesosy hoe, “Izaho izany Vatolampy izay tany an-efitra izany.”

Hoy ireo, “Nihinana ny mana avy any An-danitra izahay, ary Andriamanitra no nandraraka an’izany.”

<sup>109</sup> Hoy Izy, “Izaho izany Mana izany.” Izy, ilay Loharano io, no nijoro teo anivon’izy ireo. Ilay Mofon’Aina io no nijoro teo anivon’izy ireo.

Nefa mbola tsy nila an’Io ihany izy ireo. Naleony nanana ny famorian-dranony; satria, olona no nanao an’ity, fa Andriamanitra nandefa an’Iry. Izay ilay tena fahasamihafana. Nihady famorian-drano ho an’ny tenany!

<sup>110</sup> Hoy Izy hoe, “Raha misy olona mangetaheta, aoka izy hanatona Ahy, ka hisotro.” Izy io Loharano io.

Ary araka ny voalazan’ny Soratra Masina hoe, “Avy ao an-kibony dia hisy onin’ny Rano velona miboiboika.” Oh, Izy io fantsakana mamoaka rano io! “Avy ao an-kibony, na ao anatiny lalina ao, dia hisy onin’ny Rano velona miboiboika.”

<sup>111</sup> Izy io Vatolampy izay tao... Io ilay Vatolampin’i Hagara, tamin’ny fotoan-tsarotra; rehefa saika maty ny zanany, rehefa voaroaka tany ivelan’ny toby izy, ka teny ivelan’ny teny niaraka tamin’i Isimaela kely. Ilay ranony, tao amin’ny famorian-dranony izay nentiny niaraka taminy, dia lany. Ary napetrany teo Isimaela kely; ary lasa nandeha, lavidavitra teo, ka nitomany, ary, oh, satria tsy tiandy ny hahita an’ilay zaza ho faty. Ary tampoka teo, niteny ilay Anjelin’ny Tompo, dia nahita an’i Beri.... Berisheba izy, ilay—ilay fantsakana teo izay nikoriana tany, sady mbola mikoriana mandrak’androany. Izy no Beri-Berisheban’I Hagara, Vatolampy tany an-efitra.

<sup>112</sup> Nijoro teto Izany tao amin’ilay Loharano feno Rà, tamin’io andro io, nijoro tao amin’ny tempoly. [Elanelana tsy voaraki-peo—Mpand.]... andron’ny tafio-drivotra. Ao amin’ny Zakaria toko faha 13, Izy io Loharano voasokatra tao an-tranon’i Davida io, ho fanadiovana, sy ho (fahotana)

fanadiovana ny fahotana. Izy io Loharano io. Ary ao amin'ny Salamo 36:9, Izy ilay Loharanon'Ain'i Davida. Mbola io Loharano ao an-tranon'i Davida io ihany Izy.

Ary Izy no an'ilay poetry, tao am-pony tao. Hoy ilay Poetry hoe:  
 Misy Loharano feno Rà,  
 Nosintonina avy ao amin'ny lalàn-dràni Imanoela,  
 Rehefa mitsoboka ao ambanin'ilay riaka ny mpanota,  
 Dia hiala avokoa ireo pentin'ny helony rehetra.

Izy io Loharanon'Aina io, Loharanon'ny Rano. Izy no Tenin'Andriamanitra.

<sup>113</sup> Nahafoy Azy ny olona amin'izao andro farany izao, ilay tena Teny, Ranon'Aina; ka nihady famorian-dranon'ny anaram-piangonana ho an'ny tenany; ary, namaky, nihady, indray!

<sup>114</sup> Ary hitantsika ankehitriny, fa nanana famorian-drano mitriatriatra izy ireo. Ary dia feno tsimok'aretin'ny tsi-finoana io famorian-drano io, fireharehan'ny tsi-finoana, ireo fandaharam-pampianarana, sy ny sisa, izay mifanohitra amin'ireo fampanantenan'Andriamanitra. Mpisalasala amin'ny Teny izy ireo.

<sup>115</sup> Kanefa, ireo famorian-drano ananany ireo, hoy ny Baiboly, dia "mitriatriatra." Famorian-drano *mitriatriatra* dia famorian-drano "loaka," sady mitete izy io. Inona no ataon'io? Mitete ao amin'ny fivavahana ranom-potaka antsoina hoe Fiombonam-ben'ny Fianganana Manerantany izy io. Ary eo no itarihan'ny famorian-drano mitriatriatra azy ireo, izany rehetra izany satria nahafoy Azy izy ireo, ary nanana...ilay Loharanon'ny Rano velona; ka nanao an'ireo famorian-drano ireo.

<sup>116</sup> Mangady rafitra seminera lehibe an'ny fianarana, fampianarana, sy ny sisa. Izany no karazana famorian-drano angadian'izy ireo ankehitriny, ka ny olona dia tsy maintsy manana Ph.D. anankiray, na LL.D. anankiray, na Bakalorea an'ny Haisoratra anankiray, na ny hafa koa, alohan'ny ahafahana mitory. Famorian-drano izay feno teolojia nataon'olombelona. Hampidirin'izy ireo ao amin'ireny sekoly fianarana lehibe ireny izy ireo, ary ao amin'izany no hanatsofohany amin'ireo ny teolojiany manokana nataon'olombelona, ka alefany eny miaraka amin'izany izy ireo. Andro toy inona no iainantsika, famorian-drano nataon'olombelona! Tsy olana ilay...Tsy mahagaga ilay zavatra raha lasa ma—maimbo, oh, oadray, izany dia satria misotro avy amin'io ny olona.

<sup>117</sup> Ary rehefa mila fifaliana ny olona ankehitriny, inona no ataon'izy ireo? Ny olona, raha tokony hanaiky ny fifalian'ny Tompo, dia mitodika amin'ny fahotana, ho fifaliana. Mankany

am-piangonana ny olona ka milaza-tena ho mpanompon'i Kristy, nefo rehefa tena sahiran-tsaina izy dia mandrehitra sigara anankiray. Ary rehefa izy ireo—rehefa izy ireo no tia ny—ny hanana fifalifaliana, dia anaovany ireo fitafiany tsy mendrika ary mandeha mivoaka ka manapaka bozaka rehefa mandalo eo ny lehilahy, mba hahatonga an'ireo hisioka azy. Ataon'izy ireo ny zavatra rehetra mba halaza. Tian'izy ireo ny hitovy amin'ireo mpilalao sarimihetsika. Izany no fifaliany.

Nefa, hoy Jesosy hoe, "Izaho no fahampiany."

Ny antony handehanany amin'izany, dia satria tsy tian'izy ireo ny hisotro amin'io Loharano io. Nolavin'izy ireo Izany. Tsy tian'izy ireo ny hisotro amin'io. Akambany ao amin'ny karazana rafitra nataon'olombelona ny tenany, amin'ny karazana famorian-drano izay feno karazan-javatra mihandrona, izay ahafahany mandeha tahaka izany.

<sup>118</sup> Omaly, nitondra ny ankizy teny amin'ny renirano izahay. Mino aho fa Sabotsy maraina tamin'io. Nankeny izahay; nanjono tao anaty lakana i Billy. Ary nitondra ny ankizy izahay, ilay zafikeliko sy ny hafa, ny zanakovavy, ary ilay zanakolahy kely, ary nankeo amin'ny renirano izahay mba—mba hitsangatsangana amin'ny lakana. Tsy azonareo atao akory ny hitsangatsangana amin'ny lakana eny amin'ny renirano, satria ireo olona tsy mendrika, maloto, mahatsiravina eo amin'ilay renirano, dia mitafy tapaka sady manaonao foana. Ary nisy lakana nandalo teo anilanay, andiana zatovo roa amby folo-, na efatra amby folo taona, ny tsirairay samy niaraka amin'ny labiera teny an-tanany, sy sigara. Izany no antsoin'izy ireo hoe "miala voly." Oh, oadray! Mandra-pahoviana no hitoeran'ity izao tontolo izao ity, miaraka amin'ny rafitra tahaka izany?

<sup>119</sup> Avy eo mba hanafahany ny tenany ao amin'ilay hoe rehefa maty izy ireo dia ho any amin'ny helo, ny zavatra ataony, dia mandeha sy mikambana amin'ny iray amin'ireny famorian-drano nataon'olombelona ireny. Koa karazan'olona toy izany no mpikambana amin'io famorian-drano io. Tsy misy afa-tsy andiana fahalotoana, tsiboboka maloton'izao tontolo izao. Ary manakambana ny tenany ao amin'izany satria, toy ny nilazan'ny reniko antitra taloha hoe, "Ireo voron'ny andiany mitovy loko miaraka." Tsy ho avy eo amin'ilay Loharano izy ireo ka ho diovina avy amin'io fiainan'ny fahotana io. Tiany ny hivelona toy izany, nefo mbola mihazona foana ny filazana fa Kristiana izy ireo. Nahoana? Nihodina Taminy izy ireo, ilay tena Loharanon'ny fifaliana, Fiainana, ilay Fiainana tanteraka sy fahafaham-po. Izay no antony nanaovany an'izany, satria tiany ny hikambana amin'io. Manana karazan'olona toy izany izy ireo teo izay mino karazan-javatra toy izany.

<sup>120</sup> Vao tsy ela teto, izaho sy Rahalahy Fred, ary Rahalahy Tom, nisy andiany taminay nandeha tao amin'ny fiangonana

Batista malaza tao amin'ny tanànan'ny Tucson, mba hijery raha afaka izahay ny hahita zavatra kely izay hanome anay fahatsapana hery kely angamba. Ary nilaza zavatra hafa mikasika ny vahoaka tao Egypta ilay mpanompon'Andriamanitra, rehefa lasa izy ireo dia nihinana tongolo iay sy ny sisa izy ireo, dia te-hiverina indray izy ireo ka hihinana an'izany. Hoy izy, "Tahaka ny olona amin'izao andro izao izany."

Ary, izahay, ny rehetra nanao hoe, "Amena!" Tsy mbola nahita andiany toy io mihitsy aho! Ny fiangonana manontolo tsy njery an'ilay mpitoriteny intsony fa nitodika mba hahitany hoe iza ilay nanao "amena." Nangorohoro tahaka ny ho faty izy ireo. Tsy fantany hoe inona izany.

Rehefa, hoy Davida hoe, "Mananova feo fihobiana ho an'ny Tompo. Miderà Azy amin'ny lokanga! Miderà Azy amin'ny valiha! Aoka izay manam-pofonaina hidera ny Tompo. Fa deroa ny Tompo!" Andriamanitra dia mifaly ao amin'ny Vahoakany. Aoka ireo izay manam-pahalalana, hanao, "Amena," rehefa misy zavatra marina voalaza.

<sup>121</sup> Nahoana no tsy miala avy amin'io rafitra sy famorian-dranon'izao tontolo izao io, ho amin'ny rafitr'Andriamanitra mahatoky, dia ny fantsakana mamoaka rano, Jesosy Kristy? Nahoana ianareo no tsy mitodika Aminy, raha Andriamanitra no tahirim-pifaliana feno ho antsika, tahiry feno ho antsika amin'ny fiderana, tahiry feno ho antsika amin'ny fahafaham-po? Ny fampitoniany ny hozatro dia avy amin'Andriamanitra.

Rehefa trotraka aho, dia ao amin'i Kristy no ahitako ny fahafaham-poko, tsy ao amin'ny sigara, tsy ao amin'ireo zavatr'izao tontolo izao, tsy ao amin'ny fikambanana amin'ny fanekem-pinoana; fa amin'ny fahitana Azy, ilay Teny nampanantenaina izay Nilazany hoe, "Raha handeha Aho, dia ho avy indray Aho handray anareo." Ao amin'izany no ahitako ny fifaliako. Izy no Fifaliako.

<sup>122</sup> Milaza izy ireo ankehitriny, amin'ny alalan'ny fikambanana amin'ireny zavatra ireny sy ny fanaovana an'io Fiombonam-ben'ny Fiangonana Maneran-tany io, fa handeha hanao toerana tsara kokoa hivelomana ao. Raha ny hevitro marina, dia handeha hanao toerana tsara kokoa hanotana izy ireo. Izany dia tena... Ny zavatra manontolo dia fahotana avokoa, na ahoana na ahoana; tsy ny hivelona ao, fa ny ho faty ao. Manao ny toerany mba hanotana ao—hanotana ao, raha tokony hivelomana ao.

<sup>123</sup> Ny zavatra hafa rehetra, ivelan'i Jesosy Kristy sy ny Tenin'ny Fiaianany, dia famorian-drano mitriatriatra. Izay zava-drehetra miezaka ny hisolo an'lo; ny zava-drehetra izay ezahanareo atao mba hitondra fiadanana ho anareo,

ny zava-drehetra izay ezahanareo atao mba hitondra fampiononana ho anareo, izay karazana fifaliana rehetra izay raisinareo avy amin'ny zavatra hafa, ho solon'Ity, dia famorian-drano mitriatriatra feno fahalotoana izany. Izy no manome ny fahafaham-po tanteraka.

<sup>124</sup> Tsaroako eto, tamin'ny fahavaratra efa elaela izay, nandeha nivoaka tamin'ilay varavarana tao aoriana aho. Hisy tanora anankiray mahery setra tao nilaza tamiko, hoy izy, "Fantatralo, ny antony itenenanao foana momba ny vehivavy toy ny hoe, manao an'ireny sorta ireny sy ny sisa," hoy izy hoe, "satria efa lahy antitra ianao." Hoy izy, "Fa izay no anton'izany."

Hoy aho hoe, "Jereo aty. Firy taona ianao?"

Hoy izy, "Fito amby roa-polo."

<sup>125</sup> Hoy aho hoe, "Fony aho tanora kokoa noho ianao izao, dia efa izay ihany no notoriako."

Nahita Loharanon'ny fahafaham-po aho. Izy no anjarako. Amena! Raha mbola manolotra an'izany foana Izy, dia izay no fahatsarana. Izay no—izay no... Izay no zava-kantoko, dia ny mijery Azy, mibanjina ny Tànnany miasa ka mahita an'izay Ataony. Tsy misy loharano hafa fantattro!

Oh, saro-bidy ilay riaka

Izay mamotsy ahy ho fotsy toy ny oram-panala;

Tsy misy loharano hafa fantattro,

Afa-tsy ny Ràn'i Jesosy.

Misy Loharano feno Rà,

Nosintonina avy amin'ny lalan-dràn'i Imanoela,

Rehefa mirotsaka ao ambanin'ilay riaka ny mpanota,

Dia hiala avokoa ireo pentin'ny helony rehetra.

<sup>126</sup> Lazaike anareo, tsy misy loharano hafa fantattro afa-tsy io Loharano io. Nanadio ahy Izany fony aho naloto. Mitahiry ahy voadio Izany, satria tiako ny hivelona eo Anilany mihitsy, hisotro amin'io Rano madio izay mameno fifaliana ny fanahiko io.

Mety tena ketraka aho, sady mahatsapa fa sarotra ho ahy ny handeha ho any amin'ny... faritra hafa, tsy afaka handeha n'aiza n'aiza; amin'izay aho dia afaka handohalika ka hametraka ny rantsan-tànakao eo amin'ny fampanantenana anankiray, ka hanao hoe, "Tompo Andriamanitra, Ianao no tanjako. Ianao no fahafaham-poko. Ianao no rehetra ao amin'ny rehetrako." Afaka manomboka hahatsapa Zavatra miboiboika avy ao anatiko ao aho eo. Mivoaka avy amin'izany aho.

<sup>127</sup> Fa efa nihoatra ny dimam-polo taona aho, mifoha aho amin'ny maraina, fantatrareo hoe tahaka ny inona izany,

sarotra ho anareo ny haka an'ilay tongotra anankiray hiala eo am-pandriana. Oadray, sarotra ho anareo hanao izany; nefá misy olona ao am-baravarana, mandondona, na milaza amiko Billy fa misy maika anankiray, any ho any izay tsy maintsy andehanako. Mieritreritra aho hoe, "Ahoana no ahafahako manao an'izany?" Miezaka aho mamoaka ny tongtro anankiray.

Mieritreritra aho hoe, "Ianao no Loharano mameno tanjaka ahy. Amena! Ny tanjako sy ny famonjeko dia avy amin'ny Tompo. Ianao no fantsakako mamoaka rano! Ianao no fahatanorako! 'Izay miandry ny Tompo dia hanavao ny tanjany; elatra no hiakarany tahaka ny voromahery; hihazakazaka izy, nefá tsy ho sasatra; handeha izy, nefá tsy ho reraka.' Tompo Andriamanitra, andraikitro ity, ny handeha. Nantsoina ho eo amin'ny toeran'ny andraikitra aho." Ary ny zavatra voalohany fantatrareo, misy Zavatra manomboka mikoraraika ao anatiko ao.

<sup>128</sup> Indray andro, tao amin'ny toerana kely iray, nanao fivoriana aho tao amin'ny Topeka, Kansas; dia nisy tovolahy anankiray, mpitoriteny tanora anankiray, isan'ny mpanohana ahy voalohany. Rahalahy Roy, mipetraka eto, dia mahatadidy an'ilay toerana. Tao amin'io, tao amin'io toerana lehibe teo io, dia nisy ny—ny... Tao ambany tafo na toerana iray ity mpanompon'Andriamanitra ity, nanorotoro azy tao ambanin'izany ilay ilan-drindrina. Efa ho faty ilay ranamana kely. Loaka ny atiny. Niala tamin'ny toerany ny ratiny. Aman-taonina no nilatsaka taminy.

<sup>129</sup> Nipetraka teo am-pisakafoanana aho, niresaka tamin'ny vadiko. Hoy aho hoe, "Ry vadiko, fantatrao, fa raha teto Jesosy, fantatrao ve izay ho Nataony?" Hoy aho hoe, "Raha nanohana ahy izy, 'Mino an'izany Teny izany aho,' dia Kristy no notohanany." Ary hoy aho hoe, "Sangy ratsin'ny devoly io." Hoy aho hoe, "Raha teto Jesosy, dia ho nandeha nametraka ny Tànanay masina teo aminy Izy. Dia ho salama io tovolahy io. Tsy ahoako na potika aza ny atiny. Ho salama izy, satria handeha eo Jesosy mahalala marina Iza moa Izy. Fantany ny niantsoana Azy, marina ny Soratra Masina, voamarina tao Aminy fa Fantany hoe Iza moa Izy, ary tsy ny ... tsy misy aloky ny fisalasalana. Hametraka ny Tànanay eo aminy Izy, ka hanao hoe, 'Ry zazalahy, aoka ho salama,' dia handeha hiala eo." Dia hoy aho hoe, "Tsy misy devoly any amin'ny helo ampy hamono an'io tovolahy io, amin'izay." Hoy aho hoe, "Ho salama izy." Saingy hoy aho hoe, "Hitanao, malala, Jesosy Izy, ilay tangan'Andriamanitra masina."

Hoy aho hoe, "Mpanota aho. Teraka araka ny nofo aho. Ny raiko sy ny reniko dia samy mpanota, ary izaho dia tsinontsinona anankiray fotsiny."

Dia hoy aho hoe, "Nefa fantatrao ve? Raha manome ahy fahitana ny Tompo ka maniraka ahy ho eny, dia ho hafa indray izany." Hoy aho hoe, "Ho any aho ka hametraka ny tànako aminy, dia hiala amin'io fandriana io izy raha manome ahy fahitana Izy."

<sup>130</sup> Dia lasa ny eritreritro avy eo, "Na izany rehetra izany aza, raha fahitana ilay izy, dia inona izany? Ireto tànana maloto ireto ihany no ho eo aminy, ha-hah, ity lehilahy ity ihany no hivavaka ho azy, ireto tànana maloto ireto ihany."

Dia nanomboka nieritreritra aho hoe, "Izaho no Solontenany. Koa, tsy mahita ahy Andriamanitra. Io Ràn'ilay Anankiray marina io no mipetraka eo amin'ny alitara; io no manao fanelanelanana ho ahy. Izy fahampiako. Izy no vavako. Izy no Fiainako." Hoy aho hoe, "Ny zavatra tokana izay manao ahy hametraka ny tànako aminy, amin'ny finoana, dia satria aho manana finoana ny amin'ny fahitana. Fa tsy misy ny fahitana, dia hanao zavatra toy izany ihany ny finoana; koa afaka mihevitra ny tenako ho tsinontsinona aho, fa hihevitra Azy kosa ho rehetra ao amin'ny rehetrako. Izy no Fiainako. Izy no Mpaniraka ahy. Tsy nisy anaram-piangonana naniraka ahy; Izy no naniraka ahy. Haleloia! Handeha amin'ny Anarany aho. Hametra-tànana aminy aho." Nandeha tany aho ary nametra-tànana tamin'io tovolahy io, dia ny harivan'io dia tao amin'ilay favoriana izy, natanjaka tsara. Amena!

<sup>131</sup> Oh, eny, Izy io Loharano io. "Tsy misy loharano hafa fantatro. Afa-tsy ny Ràn'i Jesosy!" Maimbo aho, tsinontsinona aho, toy izany ny tsirairay amintsika, saingy eo anatrehan'Andriamanitra kosa dia tanteraka isika. Je-... "Aoka ho tanteraka ianareo, tahaka ny Rainareo any An-danitra izay tanteraka." Ahoana no haha-izany anareo? Satria nisy Anankiray tanteraka naneho antsika teo. Io Loharano io dia eo isan'andro, mamy. Tsy zavatra mihandrona anankiray, fa mamy isan'andro, izay manasa ny fahotako rehetra. Izy io Loharano io.

<sup>132</sup> Ankehitriny eto am-pamaranana, izao no azoko lazaina. Izay rehetra hafa noho Ity dia famorian-drano mitriatriatra, ka farany dia hitete izay ataonareo ao anatin'y; raha ataonareo ao ny fanantenareo rehetra, ny fotoanareo rehetra, sy ny sisa, ao amin'ny anankiray amin'ireny famorian-drano mihandrona ireny. Nilaza Jesosy fa famorian-drano mitriatriatra izy ireo. Hoy Andriamanitra hoe, "Mitriatriatra izy ireo, ka tsy hitete izay rehetra ataonareo ao anatin'ireo." Tsy afaka ny handeha lavitra miaraka amin'ireo ianareo, satria mitete izy ireo. Satria Izy irery no lèlana ho amin'ny Fahamarinana, ho amin'ny Fiainana, sy ho amin'ny fifaliana Mandrakizay, ary fiadanana Mandrakizay. Izy irery ihany no ilay Tokana ary lèlana tokana ho amin'Izany. Oh, oadray!

<sup>133</sup> Ilay Loharan'Aina tsy mety ritra dia Jesosy Kristy. Nahoana? Ary Iza Izy? Ilay Teny, ilay tsy miova; ilay Teny, ilay Fiainana, ilay Loharano, "ilay tsy miova omaly, sy anio, ary mandrakizay." Ho an'ny tena mpino, dia Io no fifaliany faratampony, Fiainany faratampony. Ary ny fahafaham-pony faratampony dia ao amin'i Kristy. Tsy mipaompy, tsy misintona, tsy mikambana, tsy mamona; fa mino fotsiny dia mitsahatra. Izany tokoa Izy ho an'ilay mino.

<sup>134</sup> Tahaka an'i Abrahama ray; tsy nisintona mihitsy izy, tsy niahiahy mihitsy izy, tsy natahotra mihitsy izy. Nanana ny Teny Izy. Nipetraka teo amin'ny nonon'i El Shaddai izy. Rehefa zato taona i Abrahama, dia niseho taminy Andriamanitra, ka nanao hoe, "Izaho no Tsitoha." Ny teny Hebreo dia hoe *El Shaddai*, midika hoe, "ilay Manana Nono." "Ary efa antitra ianao, ka efa lasa ny herinao, saingy mipetraha eto An-tratrako ka tsetsafo ny tanjakao avy amin'ity Loharano ity." Amena! Inona no azony rehefa nitsentsitra ny tenany? Vatana vaovao anankiray. Nahazo an'ilay zaza izy, avy tamin'i Saraha. Ary, dimam-polo taona taty aoriana, nahazo zanaka fito izy tamin'ny vehivavy hafa.

<sup>135</sup> Oh, El Shaddai! Ny Testamenta Taloha dia maneho an'izay Nataony, ny Testamenta Vaovao milaza an'izay Hataony. Amena! Tao amin'ny Testamenta Taloha . . .

<sup>136</sup> Ankehitriny dia maty ilay rivotra mampangatsiaka, koa handeha haingana aho dia hitsahatra izao, ao anatin'ny iray minitra monja.

Tiako ny hilaza an'izao alohan'ny hamaranana. Nanana ohatra tsara ny amin'izany aho indray mandeha. Nanao fisafaona aho. Fa maro ny olona eto... Nanodidina ny Georgetown, tany Milltown, fahiny dia nisy, tao amin'ny havoana tany lavitra tany, loharano anankiray. Fantsakana mamoaka rano izy io. Nanipy rano teo amin'ny—ny efatra-na dimy dian-tongtra teo izany, nifantsitsitra lalandava teo fotsiny, ary nisy loharano lehibe nanodidina teo. Ary nisy vola varahina be dia be nanodidina teo, fantatralereo, ary karazana zavatra naniry, toy ny solila. Ary, oh, naniry mafy ny ho tonga eo foana aho taloha, oh, oadray, ny ho eo amin'io loharano io. Ary nitrotra teo amin'io zavatra io aho dia nisotro fotsiny ka nisotro, dia nipetraka teo ka nisotro, niandry.

Ary isan-taona dia mbola niverina teo amin'io loharano io ihany aho. Tsy nitsahatra mihitsy izany, ririnina na fahavaratra. Tsy nety nivaingana izy ireo. Tsy afaka hampivaingana ny fantsakana mamoaka rano anankiray ianareo. Oh, tsia! Oh, tsia! Tsy ahoako na toy inona—na toy inona hatsiaka eo, tsy hampivaingana an'io izany. Hampivaingana famorian-drano anankiray ianareo; na hatsiaka kely fotsiny aza dia hahavita izany. Hitanareo?

Fa ny zavatra rehetra izay mihetsika, misy Aina ao anatiny, dia mihetsiketsika izany. Fa ianareo tsy afaka hampivaingana ny Fantsakana mamoaka rano. Na toy inona fahosan'ny fanahy manodidina an'ilay toerana, dia velona foana io Fantsakana io. Mivelòma eo amin'io Fantsakana io.

<sup>137</sup> Ary tsikarotro teo, fa nankeo aho ka nisotro tamin'io, ary, oh, oadray, rano mamy tokoa! Tsy mila matahotra mihitsy ianareo, “Manontany tena aho hoe, raha mankany aho, manontany tena raha efa nitsahatra nikoriana ve izy io?” Mikoriana izany . . .

<sup>138</sup> Mpiompy antitra anankiray no nilaza tamiko, nanao hoe, “Ny dadabeko nisotro tamin'io.” Ary hoy izy, “Tsy mbola nihena mihitsy io na inona na inona. Mbola ilay fantsakana ihany io, mifantsitsitra mankao amin’ny Blue River io.”

<sup>139</sup> Nieritreritra aho hoe, “Oh, oadray, toerana tsara hisotroana rano toy inona ity!” Nandeha tongotra teo amin’ny lèlana maily iray teo aho, mba ho eo amin'io toerana io, satria tena karazana toerana hisotroana tokoa izy io. Oh, tsara toy inona moa io rano io! Oh, oadray!

Izao dia—izaho dia nandeha tany amin'io tany hay io, Arizona ankehitriny, mbola mieritreritra an'io foana aho, “Io fantsakana mahafinaritra any io, raha mba afaka ny hitoetra eo fotsiny mantsy aho!”

Tahaka ny nolazain'i Davida indray mandeha hoe, “Oh, raha mba afaka hisotro indray mandeha amin'io fantsakana io aho!” Raha mba ho tonga eo fotsiny mantsy izy!

<sup>140</sup> Ary nipetraka teo aho indray andro, ary nisy zavatra kely nahafinaritra nitranga tamiko. Dia hoy aho hoe, “Inona no mahatonga anao faly lalandava? Maniry aho ny mba ho faly toy izao. Fa, tsy mbola nahita anao nalahelo mihitsy aho, hatramin’ny nahatongavako teto. Tsy misy zavatra malahelo mihitsy ny aminao.” Hoy aho hoe, “Feno hafaliana foana ianao. Mitsambikina ianao dia miboiboika sy mihentana. Ririnina na fahavaratra, mangatsiaka na mafana, na inona izany, dia feno fifaliana foana ianao. Inona no mahatonga anao . . . ? Inona, inona izany? Satria ve misotro avy aminao aho?”

“Tsia.”

Hoy aho hoe, “Eny, angamba misotro avy aminao eto ny bitro, ka tena tianao izany.”

“Tsia.”

Hoy aho hoe, “Eny, inona no mahatonga anao miboiboika toy izao? Inona no mahatonga anao ho tena faly? Inona no mahatonga anao feno fifaliana foana?” Hoy aho, “Satria ve—ve misotro avy aminao ny vorona?”

“Tsia.”

“Satria ve misotro avy aminao aho?”

“Tsia.”

Hoy aho hoe, “Fa, inona no mahatonga anao tena feno fifaliana?”

<sup>141</sup> Ary raha afaka ny namaly ahy io fantsakana io, dia mety hilaza an’izao izy. “Rahalahy Branham, tsy hoe satria misotro ianao; ankasisitrahako izany, ary satria afaka ny manome ho an’ny vorona aho. Manome ho an’izay rehetra te-hisotro aho. Ny zavatra tokana ilaina ataonao dia ny ho tonga ka hisotro. Fa, ny mahatonga ahy mifalifaly, tsy izany no mampiboiboika ahy, fa zavatra ato anatiko izany, manosika ahy. Zavatra mampiboiboika ahy izany.”

<sup>142</sup> Ary toy izany ny fiainana feno ny Fanahy. Tahaka ny nolazain’i Jesosy, Izy dia tao...Hitanareo, manome anareo fantsakana ivoahan’ny rano hatrao amin’ny Fiainana mandrakizay Izy, fantsakana mamoaka rano anankiray, tondraka mifantsitsitra izay mikoriana tsy an-kijanona. Na miakatra sy midina aza ny fiangonana sisa rehetra, dia mbola eo amin’io Fantsakana io hatrany ianareo.

Nahoana ianareo no haka rafitra sy famorian-drano an’ny anaram-piangonana trrainy, feno parazita sy ny maro hafa, ka hisotro eo amin’io karazan-javatra miandrona io, nefà ianareo dia nasaina ho eo amin’ny Loharano anankiray, Fantsakana mamoaka rano anankiray?

<sup>143</sup> Mieritreritra aho hoe ahoana fotsiny no hanosehany an’izany, ny hientanany, sy-sy hirondroronany, sy hihomehezany, sy hifaliandy, sy hitsambikinany, ary hihetsiketsehany. Mangatsiaka, manorana; mafana, main-tany, na dia karakaina ny firenena sisa rehetra, dia miboiboika fotsiny toy ny nataony foana izany. Satria lalina izy, ka mamàka, avy any amin’ny vatolampy any no ivoahany.

<sup>144</sup> Oh, avelao aho hivelona eo amin’io Mifantsitsitra io! Alaivo ireo rafitrareo rehetra nataon’olombelona izay tianareo, ireo fantsakanareo miandrona trrainy rehetra, fa avelao aho ho eo amin’ny...na ireo famorian-drano miandrona. Fa, avelao aho ho tonga eo amin’io Loharano io, avelao aho ho tonga eo amin’Izy feno fotsiny. Izy no Fifaliako. Izy no Fahazavako. Izy no—Izy no Tanjako. Izy no Ranoko. Izy no Fiainako. Izy no Mpanasitrana ahy. Izy no Mpamontjiko. Izy no Mpanjakako. Izay rehetra ilaiako dia hitako ao Aminy. Nahoana aho no te-handeha ho any amin’ny zavatra hafa?

<sup>145</sup> Rahalahy, ranabavy, tsy ho avy eo amin’io Loharano io ve ianareo izao hariva izao? Tsy tianareo ve, raha tsy mbola teo ianareo, tsy handray an’Izany ve ianareo izao hariva izao raha hanondrika ny lohantsika isika?

<sup>146</sup> Famorian-drano mitriatriatra, mitete, mitsonika, mitsonika ao amin’io izao tontolo izao, ireo fahalotoana avy amin’ny

tranom-biby sy avy tamin'ireo andro hafa. Nahoana no tsy ity Fantsakana ity, izay tsy ahafahan'izany karazan-javatra izany mitoetra, io Loharano lehibe feno Rà io, nosintonina avy tao amin'ny lâlan-dràn'i Imanoela? Nahoana ianareo no tsy handray an'izany izao hariva izao? Andriamanitra anie hanampy antsika izao hariva izao, amin'ity tany maina, sy karakaina ity. Tahaka ny nilazan'ny mpaminany hoe, "Izy no Vatolampy amin'ny tany mahareraka." Izy io Loharano io. Tsy ho tonga eo Aminy ve ianareo izao hariva izao, ao amin'ny fonareo, raha hivavaka isika?

<sup>147</sup> Ray malala any An-danitra, tsy misy Loharano hafa, arak'izay lalaovin'ny mozika, "Tsy misy loharano hafa fantattro; afa-tsy ny Ràn'i Jesosy." Teo aho no teraka, teo aho no nihabe; tiako ny hivelona eo, sy ho faty eo, ary hitsangana indray eo, ao amin'ny Fanatrehany. Isan'andro, Tompo, dia avelao aho ho ao amin'ny Fanatrehany, satria tsy misy hafa fantattro. Tsy misy fanekem-pinoana, tsy misy fitiavana; tsy misy fitiavana afa-tsy Kristy, tsy misy fanekem-pinoana afa-tsy Kristy, tsy misy boky afa-tsy ny Baiboly, tsy misy zavatra hafa, tsy misy fifaliana Ivelany. Raha esorina amiko Izy, Andriamanitra ô, tsy ahoako na firy avy amin'izao tontolo izao no ananako, izany—izany dia mbola ho faty foana, dia hirenireny aho miaraka amin'ny tànako eo an-dohako. Raha esorina amiko Izy, dia ho vita ny amiko, Tompo. Fa avelao Izy ho ato anatiko, ka ny Desambra ho tsara tahaka ny May, amin'izay dia tsy hisy toerana mafana ary tsy hisy ny toerana karakaina, na dia ny fahafatesana aza tsy manana fandresena. Avelao izahay mba banana Azy, Ray. Omeo Izy, amin'ny fahabetsahana, ho an'ny mpino rehetra eto izao hariva izao, raha niandry tato amin'ity efitrano ity izy ireo.

<sup>148</sup> Maro amin'izy ireo no tsy maintsy hamily fiara eny an-dàlana izao hariva izao, raha hiverina any an-tranony izy ireo, ho toy izao anie no ao an-tsain'izy ireo, "Mivelona eo amin'io Loharano io aho. Mivelona eo aho, misotro rano mamy, isan'ora isan'ora."

<sup>149</sup> Fa raha tsy nandray an'izany izy ireo, hatramin'izao, dia handray Azy anie izy ireo izao, ahafahany maka an'io Loharano io miaraka aminy. "Hiaraka aminareo Aho; homba anareo Aho hatramin'ny faran'izao tontolo izao." Ekeo ireo zavatra ireo, Ray.

<sup>150</sup> Ary ankehitriny raha manondrika ny lohantsika isika, misy olona ve eto, izao hariva izao, na firy no te-hilaza hoe, "Tompo, raiso aho ho eo amin'io Loharano izao ankehitriny izao. Tsy tonga eto mihitsy aho mba handre fotsiny; tonga eto aho mba hahita Zavatra. Tonga eto aho mba hahita Anao, Tompo. Mila Anao aho izao hariva izao. Tongava ato am-poko izao ankehitriny izao. Hataonao ve izany, Tompo?" Hitahy anareo Andriamanitra. Ny Tompo anie hitahy ny tsirairay.

<sup>151</sup> Ray, Hitanao ireto tâhana, izay mitsangana sy manodidina ny rindrina aza, sy ao amin'ny efitra ilany, any ivelany. Ianao—Ianao no mahita azy ireo, Ray. Izaho—izaho mangataka mba Hanoloranao izay rehetra ilainy. Angamba efa nisotro tamin'ny famorian-drano tranainy izy ireo, Tompo, nijanona fotsiny antsasa-dàlana izay nisy olona nihady famorian-drano, ka lasa voaloton'ireo karazana fampianarana hafahafa, mandà ny Teny. Mangataka aho, Andriamanitra, mba hanatonan'izy ireo Azy Ilay Loharano izao hariva izao, io Loharanon'Aina io. Ekeo izany, Ray. Ankiniko Aminao izy ireo ankehitriny amin'ny Anaran'i Jesosy.

<sup>152</sup> Fa Ianao no nilaza tamiko hoe, “Raha mangataka zavatra amin'ny Anarako ianao, dia hotanteraka izany.” Ankehitriny, tsy hangataka an’izao aho, Tompo, raha tsy mihevitra aho fa ho tanteraka izany. Izaho dia—izaho dia hilaza izany fotsiny amin'ny fahazarana. Saingy mangataka aho ho azy ireo, amin'ny fahatsoram-po. Mangataka aho ho azy ireo, mino fa Ianao dia hanaiky an’izay Nampanantenainao.

<sup>153</sup> Ary ankehitriny esoriko amin’io famorian-drano io izy ireo izao hariva izao. Esoriko avy eo amin’io toerana izay nisotroany io izy ireo, teo amin’izay tsy nahafa-po azy ireo; ho amin’ity Loharano ity. Ataoko izany amin'ny Anaran'i Jesosy Kristy.

<sup>154</sup> Anao izy ireo, Tompo. Avelao izy ireo hisotro avy Aminao, ilay Rano velona, ilay Loharanon'ny Rano velona. Amin'ny Anaran'i Jesosy, no angatahiko izany. Amena. Ekeo izany, Tompo.

Oh, saro-bidy ilay riaka  
 Izay manao ahy ho fotsy toy ny oram-panala;  
 Tsy misy loharano hafa fantattro,  
 Afa-tsy ny Ràn'i Jesosy.  
 Inona no afaka hanadio ny otako?  
 Tsy misy afa-tsy ny Ràn'i Jesosy;  
 Inona no afaka hamerina ahy indray?  
 Tsy misy afa-tsy ny Ràn'i Jesosy.

Jesosy ô, sitrano ireo, Tompo! Ekeo izany, Tompo, amin'ny alalan'ny Anaran'i Jesosy. Mangataka aho, Andriamanitra, fa Ianao . . . ? . . . Ianao no mahalala ny zavatra rehetra.

Tsy misy loharano hafa fantattro,  
 Oh, afa-tsy ny Ràn'i . . .

<sup>155</sup> Eritrereto izany, tsy misy loharano hafa fantattro! Tsy mahalala zavatra hafa afa-tsy Izy aho. Tsy misy zavatra hafa iriko ho fantattro afa-tsy Izy. Tsy misy afa-tsy ny Ràn'i Jesosy! Oh!

Oh, saro-bidy ilay riaka  
 Izay manao ahy ho fotsy toy ny oram-panala;  
 Tsy misy loharano hafa fantattro,  
 Oh, afa-tsy ny Ràn'i Jesosy.

<sup>156</sup> Raha mihira an'izany indray isika, dia ndeha isika hifandray tànana. Mifankatia ve ianareo? Misy olona ve eto nanana zavatra niadivana tamin'ny olon-kafa? Raha misy izany, ndeha alamino izany. Sitrakareo ve? Ndeha tsy hiala eto tahaka izany isika. Hitanareo? Raha nanana ady tamin'ny olona ianao, mandehana alamino izany, izao ankehitriny izao. Izao ankehitriny izao no anjaranao ny manatona azy, lazao hoe, "Rahalahy, ranabavy, nilaza zavatra mikasika anao aho, nieritreritra zavatra aho. Tsy tena tiako ny nanao izany. Mamelà ahy." Hitanareo, izay no fomba hanaovana an'io. Ndeha isika hanana an'ilay Loharano ao amintsika mihitsy, amin'ny fotoana rehetra. Hitanareo?

Tsy misy loharano hafa fantatro,  
Afa-tsy ny Ràn'i Jesosy.

Oh, saro-bidy ilay riaka  
Izay manao ahy ho fotsy toy ny oram-panala;  
Oh, tsy misy loharano hafa fantatro,  
Afa-tsy ny Ràn'i Jesosy.

<sup>157</sup> Oh, tsy mahafinaritra ve Izy? Tsy misy loharano hafa! Tsy handoto ny tenantsika amin'ny zavatra hafa isika. Tafasaraka isika, nahafoy an'izao tontolo izao any aoriane. Tsy ilaintsika intsony ny tongolo lain'i Egypta sy ireo famorian-drano mitriatriatra. Miaraaka amin'i Jesosy Tompo isika ao amin'ny dian-tsika, ilay Vatolampy nokapohina, amena, mihinana ny Mana avy any Ambony, sy misotro; mihinana Sakafon'anjely, ary misotro avy amin'ilay Vatolampy. Amena!

Tsy misy loharano hafa fantatro,  
Afa-tsy ny Ràn'i Jesosy.

Ankehitriny dia hanondrika ny lohantsika isika.

<sup>158</sup> Mivavaka aho mba hitahian'Andriamanitra betsaka ny tsirairay aminareo, mba ny Fahasoavany sy ny famindrampony no homba anareo mandritra ny herinandro ho avy. Ary raha misy zavatra hitranga, ka misy lasa any ambadiky ny voaly ny iray aminareo ankehitriny, dia tsarovy fotsiny fa ora vitsy fatoriana sy fitsaharana fotsiny izany mandra-pihaonantsika. Tsarovy, fa, "Ireo izay velona ka mitoetra dia tsy hialoha an'ireo izay efa nodimandry, fa ny Trompetran'Andriamanitra, ilay Trompetra farany . . ." Ny fahenina no avy naneno. Fa io Trompetra farany io, tahaka ny Tombokase farany, dia ho ny Fihavian'ny Tompo. "Haneno Io, ary ireo maty ao amin'i Kristy no hitsangana aloha." Mitsahatra fotsiny hatramin'io fotoana io.

<sup>159</sup> Ary raha tafintohina ianareo, dia tsarovy:

Raiso eo aminao ny Anaran'i Jesosy,'  
Ho ampinga amin'ny fandrika rehetra;'  
Ary rehefa manodidina anao ny  
fakam-panahy,  
Tonony moramora fotsiny io Anarana masina  
io amin'ny vavaka. (Handositra ny devoly.)

<sup>160</sup> Tsarovy fotsiny, manantena ny hihona aminareo eto izahay amin'ny Alahady heriny maraina. Ento ny marary sy marofy. Hivavaka ho anareo aho. Mivavaha ho ahy ianareo ankehitriny. Hanao izany ve ianareo? Manaova, "Amena." [Hoy ny fiangonana hoe, "Amena."—Mpand.] Hivavaka ho anareo aho, mba hitahian'Andriamanitra.

... Anarana amin'ny vavaka.

Anarana sarobidy, Anarana sarobidy, O tena mamy!

Fanantenan'ny tany sy fifalian'ny Lanitra;

Anarana sarobidy, O tena mamy!

Fanantenan'ny tany sy fifalian'ny Lanitra.

Miondrika amin'ny Anaran'i Jesosy,

Lavo miankohoka eo An-tongony,

Hosatrhohintsika Mpanjakan'ny mpanjaka ao An-danitra Izzy,

Rehefa mifarana ny dian-tsika.

Anarana sarobidy, Anarana sarobidy, (tsy mamy sy sarobidy ve izany?)

Fanantenan'ny tany sy fifalian'ny Lanitra;

Anarana sarobidy, Anarana sarobidy, O tena mamy!

Fanantenan'ny tany sy fifalian'ny Lanitra.

<sup>161</sup> Tena sarotra foana ny mandoa anareo. Na dia fantatro aza fa mafana be ianareo, saingy misy zavatra fotsiny mikasika... Ndeha isika, andininy iray amin'ny anankiray, hataonareo ve izany? [Hoy ny fiangonana hoe, "Amena."—Mpand.] Hataonareo ve izany? *Isaorana Anie Ilay Tady Izay Mamatotra*, ranabavy. Firy no mahay an'ilay hira fahiny? Nihira an'io isika taloha, taona maro lasa.

<sup>162</sup> Ary nieritreritra aho, izao hariva izao, "tànana roa, tamin'ireo an-jatony, no sisa tavela," fa nihira an'izany hira izany iahay taloha nanerana ny tabernakla, sady nifandray tànana. *Isaorana Anie Ilay Tady Izay Mamatotra*. Maro tamin'izy ireo no naleviko, tao amin'ilay fasana etsy mihitsy. Miandry izy ireo. Hahita azy ireo indray aho. Hitako izy ireo, tsindraindray, ao amin'ny fahitana, rehefa mijery any ambadiky ny voaly aho. Eo izy ireo.

Ndeha isika hanondrika ny lohantsika ankehitriny raha mihira isika.

*Isaorana anie ilay tady izay mamatotra*

Ny fontsika ao amin'ny fitiavana Kristiana;

Ilay fiombonana...

Dia tahak'ilay any Ambony.

Rehefa isika...

Ahinjiro ankehitriny ka raiso ny tànan'ny hafa.

. . . ampaham-pisarahana,  
Aondreho ny lohanareo ankehitriny

Manome antsika fanaintainana anaty izany;  
Saingy mbola hifandray am-po foana isika,  
Sady manantena ny hihaona indray.

<sup>163</sup> Raha miondrika ny lohanareo. Averiko amin'ny pastora ny  
fivoriana ankehitriny, ka hampirava ny . . .



*FAMORIAN-DRANO MITRIATRIATRA MAG64-0726E*  
(Broken Cisterns)

Ity Hafatr'i Rahalahy William Marrion Branham ity, izay notoriana tamin'ny Teny Anglisy ny Alahady hariva 26 Jolay, 1964, tao amin'ny Branham Tabernacle, ao Jeffersonville, Indiana, U.S.A., dia nalaina avy tamin'ny horonam-peo ary natonta manontolo amin'ny Teny Anglisy. Ity fandikana amin'ny Teny Malagasy ity dia natonta sy nozarain'ny Voice Of God Recordings.

MALAGASY

©2013 VGR, ALL RIGHTS RESERVED

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Filazana fahefan'ny tompon'ny boky

Tsy azo adika. Ity boky ity dia azo atao printy amin'ny fanaovam-printy ao an-trano ho an'ny fampiasana manokana na ho zaraina, tsy misy sarany, ho fitaovana iray hanaparitahana ny Filazantsaran'i Jesosy Kristy. Ity boky ity dia tsy azo amidy, na adika indray amin'ny refy lehibe, na alefa amin'ny siteweb iray, na tehirizina amin'ny fomba nisy nanesorana, na adika amin'ny fiteny hafa, na ampiasaina ho fangataham-bola raha tsy misy alàlana voasoratra mazava avy amin'ny Voice Of God Recordings®.

Ho an'ny fanazavana fanampiny na ho an'ny fitaovana hafa efa azo raisina, dia iangaviana hifandray amin'ny:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)